

Apocalipsis

Baharopure ahri dacho to dohse wahahtore marine masichu yoaha Jesucristo

1 ¹ Ahri pui Jesucristo marine to masichu yoarire yahu joarocai nija. Cohamacu sehe ture yahu dutiro curi jire tirore, to yainare tirore dahra cohtainare masichu yoa dutiro. ã jiro michapucacãta to dohse wahahtore masichu yoari jire tiro. Mahanocã duhsa mujano nina to ã wahahto. Jesucristore to ã cûchu tiro sehe anjore ture yuhure Joãore yahu dutiro warocari jire. ² ã jicu yuhu João jipihtiare yu ñurire yahu joarocai nija. Cohamacu ya durucuaré Jesucristo ya buheare yahu joarocai nija.

³ Ahri pui baharopu to dohse wahahtore yahu joai nija. Mahanocã duhsa mujano nina ahri jipihtia ti ã wahahto. ã jia jipihtina ahri pure buheina, yu yahuaré noano tuhoina yu yahuriro sehe yoaina wahcheina jiahca.

Siete curuari macainare Jesu yaina cahmachuinare joarocaha João

⁴ Yuhu, João musare siete curuari macainare Jesu yainare Asia yahpa macainare joarocaja: Cohamacu to cahia mehne musare noa dutija. ã yoa to yoadohoa mehne noano jiga musa. Tiro panoputa ã jirucuriro jia tiri jire. Mipû cûhure ã jirucura. Baharopu tarohca. To puhtoro dujiro panoi jiina siete pjacu bajueraina jira. Tina ti cahia mehne noano jiga musa tjoa.

⁵ Jesucristo to cahia mehne noano jiga musa tjoa. Cohamacu yare mahõno marieno yahuriro jira tiro. ã jiro to yariari baharo to masa mujari baharo ne pari turi yariasi tiro. “Õ sehe masa mûjaahca yu yaina”, ni ñu quihõ mûhtariro jira tiro. ã jiro jira jipihtina ahri yahpa macaina puhtoa ti bui puhtoro jira tiro. Marine cahino to di cohãri mehne mari ñaare cosawere tiro. ⁶ ã cosawero marine puhtoa sõre tiro. Sacerdotea marine wahachu yoare tjoa. Cohamacu Jesu Pucuro to yare yoahinare marine sacerdotea sõre tiro. Jipihtia dachoripe “Tuariro jira”,

ni wahche payorucunahca mari jipihtina tirore. Jipihtina bui pũhtoro ã jirucura tiro. Āta jirucujaro.

7 Noano wacũ masi cohtaga m̄sa. Me curuari watoi duji tarohca Cristo. To ã tachũ ñ̄uahca jipihtina. Tirore c̄jã puha wajārina c̄jiri c̄hũ tirore ñ̄uahca. To ã tachũ ñ̄ua ahri yahpa macaina tirore cahmaeraina jipihtia curuari macaina tuaro cahya, tiiahca. Āta yoajaro.

8 Ō sehe nina mari pũhtoro Cohamacũ: “Yũhũ jipihtiare bajuamehneriro jija. Ā yoa jipihtiare pihlichũ yoah tiro jija. Tua yũhdũrucariro jija yũhũ. Panopũ ã jirucua tii. Mipũ c̄hũre ã jirucuja. Baharopũ taihtja”, nina Cohamacũ tua yũhdũrucariro.

Cristore si siterirore to ñ̄ũre yahuha João

9 Yũhũ João m̄sa coyeiro Jesu yairo jija. Ā jicũ m̄sa yoaro seheta yũhũ c̄hũ Jesu yare yũ yoari buhiri ñ̄ano yũhdũhi. Ā yoa m̄sa yoaro seheta yũhũre ti ã ñ̄ano yoapachũta Jesu yoadohoa mehne Jesure cohãerahi. Mari c̄ũno potori pũhtoro to sũho jiro macaina c̄jilhti jija. Yũ ya dihta macaina ti cohãriro jicũ Patmo wama tiri nũcopũ jihi. Cohamacũ yare, Jesucristo to buheri c̄hũre painare yũ buheri buhiri tópu ti cohãriro jihi. 10 Tóí yũ jichũ c̄ũ dacho domingo jichũ Espiritu Santo yũhũre cahãnopũ ñ̄ono nihre. To ã ñ̄ochũ yũ baharo bũhusehei tuaro durucua bisiro coa tahre. Corneta to tuaro bisiro seheta tó seheta bisiro coa tahre to durucua. 11 Ō sehe nino coa tahre yũ tũhochũ:

—Mipũ m̄ ñ̄ũhtire joari p̄ũi joa õga. M̄ ã joa õri baharo siete curuari macainare Cohamacũ yainare warocaga tí p̄ũre. Tina siete curuari Asia yahpai jia macari macaina jira. Efeso macainare, Esmirna macainare, Pérgamo macainare, Tiatira macainare, Sardis macainare, Filadelfia macainare, Laodicea macainare m̄ ñ̄ũhtire joarocaga —nino coa tahre yũhũre.

12 To ã nichũ tũhocũ majarerc̄achi yũhũre durucurirore ñ̄ũi tai. Ā majarerc̄acũ siete sihãa pocare ti duhu payoa yuc̄re uru mehne ti yoari yuc̄re ñ̄ũhi. 13 Tí yuc̄ watoi ducurirore masũno yoaro sehe bajurirore ñ̄ũhi. Tiro yoari suhtiro to dahporipũ s̄uri suhtirore s̄ariro jihre. Ā jiro uru mehne ti yoari cahsaro mehne to p̄ebuhu bui tũã dihoriro jihre. 14 Ā yoa to p̄joa yaja p̄joari yoaro sehe noano yehsehre. To capari pichaca pohna yoaro sehe sihre. 15 To dahpori bronce wama tiri

comaa siri comaa yoaro sehe si sitehre. Broncere pichaca mehne ti noano jūweri baharo tíre wahtara noano si pa dutia. Ti noano wahtariro yoaro sehe to dahpori noano si sitehre. Ñ yoa to durucua payu poayeri yoaro sehe tuaro bisiro coa tahre. **16** To wamomaca poto bñhusehei siete ñahpichoha pocare cjuahre. Ñ yoa to duseroi ñosari pjĩ pñ bñhuseheri siori pjĩne cuhcũhre. Ñ yoa sũ dacho macariro to tuaro minoano seheta to wñhdña tuaro si sitehre.

17 Ñ jicũ tirore ñucũ to dahpori cahai doca caha sũhi yariariro yoaro sehe. Yũ ã doca caha sũchũ ñũno tiro to wamomaca poto bñhusehe mehne yũhũre duhu payo õ sehe nihre:

—Cuii tjiga. Yũhũ jipihtiare bajuamehneriro jija. Ñ yoa jipihtiare pihtichũ yoahrtiro jija. **18** Catiriro jija yũhũ. Yariariro jimai. Mipũre ñũga. Jipihtia dachoripe ã catirucuriro jija yũhũ. Ñ yoa yariaina ti jiroi pũhtoro jija. Yariaina ti jiro macari sopaca sawire yũ cjuaboriro seheta tórpũ jĩinare na wio, pari turi catichũ yoa masija yũhũ. **19** Ñ jicũ mipũ wahahtore ñucũ, joa õga. Baharopũ to dohse wahahto cũhũre ñucũ joa õga mũhũ. **20** Ahri siete ñahpichoha pocare yũ poto bñhusehei yũ cjuaa pocare yahuihtja mũhũre. Siete sihãa pocare ti duhu payoa yucũ uru yucũ cũhũre yahuihtja. Õ sehe jia yahuaire ranopũ masare ne yahuera tii. Õ sehe jira tí: Siete ñahpichoha poca siete curuari macaina yũ yaina cahmachuina pũthoa jia nina mari piti dahre buhechũ. Ñ jia siete sihãa pocare ti duhu payoa yucũ siete curuari macaina yũ yaina jia nina mari piti dahre buhechũ —nihre yũhũre.

Efeso macainare Jesu yainare joa dũca dutiha Joãore

2 ¹ Ñ ni tuhsũ õ sehe ni namohre yũhũre joa dutiriro: —Efeso macaina yũ yaina, ti pũhtoro cũhũre õ sehe ni joarocaga mũhũ: “Yũ wamomaca poto bñhusehei siete ñahpichoha pocare cjuariro jija. Ñ jicũ siete sihãa dapoa yucũ uru mehne ti yoaa yucũ watoi tiniriro jija. Ñ tiniriro jicũ mũsare õ sehe ni yahuja: **2** Jipihtia mũsa yoarire masi pahñoja. Yũ ya cjihtire tuaro mũsa dahrarire, yũhũre mũsa wacũ tua duhuerari cũhũre noano masija. Ñaare yoinare mũsa ñũ yabichũ cũhũre masija. Ñ yoa ‘Jesu buhe dutiro to cũrina jija’, nimirare quihõno ti buherachũ, quihõno ti yoaerachũ ñña,

mahñoina ti jichu masire musa. ³ Yu yare musa yoari buhiri musa ñano yuhdɔpanahta yuhure ne duhuerare musa. ⁴ Ñ noano yoaina jipanahta cūnore tó yoerare musa. Ahri jira tí: Yuhure musa noano cahĩ mɔhtariro seheta mipure yoerara musa. ⁵ Yuhure musa cahĩ mɔhtarire wacūga musa tjoa. Mipure yuhure musa cahiera cureire wacūga. Ñ yoa Cohamacu yare tuaro cahmaga tjoa. Ñ cahmana, yu yare musa yoa mɔhtariro seheta yoaga tjoa. Musa ã yoerachu sihãriare yu duhu payodu musa ya dɔre yu dapodure musare nanocaihtja. (Ñ nicu õ sehe ni yahui nija musare. Musa tó macaina yuhure cohãboca. Ñ cohãna tó purota pihtinahca musa ñaa yoare duhuerana.) ⁶ Yuhure cahiera cureina jipanahta ahrire noano yoare musa: Nicolaita wama tiina ti ñaa yoarire ñu yabira musa. Yuhu cūhu ti yoarire ñu yabija. ⁷ Cahmori tiina jira musa. Ñ jina musa ya curuari macainare yu yainare Espiritu Santo to yahurire tɔhoga musa. Õ sehe nina tiro: ‘Jipihtinare Jesure wacū tua duhuerainare Cohamacu masare to cūno paraíso wama tiro macadu dichare chu dutiitja. Tu dicha catichu yoaa jira’, nina Espiritu Santo”, ni yahu joarocaga Efeso macaina yu yainare, ti puhtoro cūhure.

Esmirna macainare Jesu yainare joaroca dutiha Joãore

⁸ Esmirna macaina yu yainare, ti puhtoro cūhure õ sehe ni joarocaga mɔhu: “Yuhu jipihtiare bajuamehneriro jija. Ñ yoa jipihtiare pihtichu yoahrtiro jija. Yariaa wahai. Pari turi catija tjoa. Ñ jicu õ sehe ni yahuja musare: ⁹ Musa ñano yuhdɔrre masija. Pjacuoina musa jichu cūhure masija. Ñ jipanahta Cohamacu yare noare pjíro cɔara musa. Paina sehe ‘Judio masa jija’, nimarina mahñoina jira. Tina musare ti ñano quiti dahrerire masija. Tina Satana yaina jira. ¹⁰ Mipure musa ñano yuhdɔhtire cuiena tjiga. Tɔhoga musa. Watino musare Cohamacure duhu dutiro cãina musa mehne macainare peresu yoa dutirohca. Diez dachori waro ñano yuhdɔnahca musa. Ti ã ñano yoachu musare ti ã wajãmoñopachuta yuhure yu ya cūhure cohãena tjiga. Musa ã yuhure cohãerachu ñucu jipihtia dachoripe Cohamacu cahapu musare ã jirucuchu yoaitja. ¹¹ Cahmori tiina jira musa. Ñ jina musa ya curuari macainare yu yainare Espiritu Santo to yahurire tɔhoga musa. Õ sehe nina tiro: ‘Jipihina Jesure wacū tua duhueraina pichacapu wahasi.

Ti yariari baharo pichacapu wahasi', nina Espiritu Santo", ni joarocaga Esmirna macaina yu yainare, ti puhtoro cūhure.

Pérgamo macainare Jesu yainare joaroca dutiha Joãore

12 'Pérgamo macaina yu yainare, ti puhtoro cūhure õ sehe ni joarocaga mūhū: "Yūhū ñosari pji pu bñhuseheri siori pjiñe cjuariro jija. Mūsare õ sehe ni yahuihtja: 13 Mūsa yoarire, mūsa ya maca macaina ti yoari cūhure masija. Tó macaina puhtoro Satana jira. Tó macaina Satanare ño payoina Antipare yu yare noano yahuriro cjirore wajāre. Tirore ti ã wajāchū ñpanahta yu yare yoarucuna yūhure ne wacū tua duhuerare mūsa. 14 Mūsa ã wacū tua duhuerapanahta mahanocā yūhure yūhdūrcare mūsa. Cāina mūsa mehne macaina Balāa ya buheare cahmana. Panopu Balāa puhtoro Balac wama tirirore õ sehe ni buhea tire: 'Israe masare yūhdūrcā duacu "Cohamacu jira", mūsa nia masurine ño payo mūsa duhu payoa chūare chū dutiga tinare. ã yoa numia mehne ñano yoachū yoaga tinare', ni buhea tire Balāa cjiro. Cāina mūsa mehne macaina to buheare cahmana. 15 ã yoa paina mūsa mehne macaina Nicolaita wama tiina ya buhea sehere duhu duaerara. 16 ã jina mūsa ñaa tūhotumari cjirore tūhotu cohtota, Cohamacu yare tuaro cahmaga tjoa. Mūsa ã cahmaerachū ñūscū soaro mehne mūsa cahapu wahacu, ã ñano yoaina mehne cahmacheihca yu dūseropu jiri pji ñosari pji mehne. 17 Cahmori tiina jira mūsa. ã jina mūsa ya curuari macainare yu yainare Espiritu Santo to yahurire tūhoga mūsa. Õ sehe nina tiro: 'Jipihtinare Jesure wacū tua duhuerainare maná wama tiri chūare to nūori chūare waihtja. Yehsea tāa cūhure waihtja tinare. Tí tāare wahma wamare yu joa õa tāa jiahca. Paina tí wamare ne masisi. Tí tāare naina dihta tí wamare masiahca', nina Espiritu Santo", ni joarocaga Pérgamo macaina yu yainare, ti puhtoro cūhure.

Tiatira macainare Jesu yainare joaroca dutiha Joãore

18 'Tiatira macaina yu yainare, ti puhtoro cūhure õ sehe ni joarocaga mūhū: "Yūhū Cohamacu macūno yu capari picha pohna yoaro sehe sira. ã jia yu dahpori bronce wama tiri comaa ti wahtari comaa yoaro sehe si sitera. Mūsare õ sehe ni yahuja: 19 Mūsa yoarire masija yūhū. Cohamacure paina

cũhũre m̄sa cahĩrĩre, yũhũre m̄sa cohãerarĩre, painare m̄sa yoadohorĩre, ñano yũhdũpanahta yũhũre m̄sa duhuerarĩre masija. Wahmanopũ m̄sa yoarĩro yũhdoro mipũ sehere noano yoa namona nina m̄sa. Tĩ cũhũre masija yũhũ. 20 M̄sa ã noano yoina jipanahta õ sehe yũhũre yũhdũrcahre m̄sa: Jezabe wama tiricoro ‘Cohamacũ yare yahu m̄htaricoro jija’, ni mahñoricoro m̄sare to ñano buhechũ tũhona ticorore tuhtierare m̄sa. Mahño buhero yũ yainare yũhũre dahra cohtainare numia mehne ñano yoachũ yoara. ã jiro ‘Cohamacũ jira’, ti nia masũrine paina ño payo ti duhu payoa chũare chũ dutira ticoro yũ yainare. 21 To ñaare to cahyahtore cohtasinimai. Yũ ã cohtapachũta m̄sa mehne to ñano yoaare duhu duaerare. 22 Yũhũre tũhoga m̄sa. Ticorore dohatichũ yoaihtja. Ticoro mehne ñano yoina cũhũre dohatichũ yoaihtja. ã jia tina p̄jĩro ñano yũhdũahca. ãta yoaihca tinare ticoro mehne ti ñano yoaare ti cahyaerachũ, tĩre ti duhuerachũ. 23 ã yoa ticoro ya buheare cahmainare wajãihtja. Yũ ã yoachũ ñna jipihina yũ yaina yũ noano masĩro jichũ masiahca. Masa ti tũhotuare ti goa p̄jaa cũhũre masija. Yũ ã masĩro jichũ masiahca tina ticorore yũ buhiri dahrechũ ñna. Jipihina m̄sa ñaare yoiri buhirire buhiri dahreihhtja m̄sare. ã yoa m̄sa noaare yoiri wapa sehere noano yoaihtja m̄sare. 24 Paina m̄sa mehne macaina Tiatira macaina ticoro ya buheare cahmaerare. M̄sa sehe Satana ya buheare ‘Pano to yahuerari c̄jiri’, ti nia buheare cahmaerare m̄sa. ã jicũ m̄sa sehere duti namosi yũhũ. 25 Ahri dihtare yoa duti namoihtja m̄sare: M̄sa cahapũ yũ tahto pano yũ buheare m̄sa masĩre ne mahanocã duhuena t̄jiga. 26-27 Jipihina ñaare duhuinare yũ yare ã yoarucinare pũhtoa sõihtja. Yũ Pũcũ yũhũre to pũhto sõriro sehetã m̄sa cũhũre pũhtoa sõihtja. Jipihina yahpari macaina bui pũhtoa sõihtja m̄sare. ã pũhtoa sãana, m̄sa docai jĩinare jipihina yahpari macainare tuaro dutinahca m̄sa. Dihĩ biatore mari yucũcũ mehne pohachũ dõĩ to wahtiaro sehetã Cohamacũre yũhdũrcainare ãta yohanca m̄sa. 28 ã jicũ m̄sare yũ yare ne duhuerainare bohrea m̄ja tachũ m̄ja tariare waihtja m̄sare. 29 Cahmori tiina jira m̄sa. ã jina m̄sa ya curuari macainare yũ yainare Espĩritu Santo to yahurire tũhoga m̄sa”, ni joarocaga Tiatira macaina yũ yainare, ti pũhtoro cũhũre.

Sardis macainare Jesu yainare joaroca dutiha Joãore

3 ¹ Sardis macaina yu yainare, ti puhtoro cũhure õ sehe ni joarocaga mũhũ: “Yũhũ siete pjacu bajuerainare Cohamacu yainare dutiriro jija. ã yoa siete ñahpichoha pocare cjuariro jija. Mũsare õ sehe ni yahuja: Mũsa yoarire masija. Õ sehe ni tũhotumana paina mũsare: ‘Tina Cohamacu yare noano yoa pahñoina jira’, ni tũhotumana mũsare paina. Ti ã ni tũhotupachũta Cohamacu yare noano yoaerara mũsa. ² ã jina noano yoaga mũsa ‘Ñãare yoari’, nina. Cohamacu yare mũsa masirire noano wacũga, ‘To yare duhuri’, nina. Cohamacu to ñũchũ noano yoa pahñoerasinire mũsa. ³ ã jina yu yare mũsa tũho mũhtarire noano wacũga mũsa. ã wacũna yu yare yoaga tjoa. Cohamacu yare pari turi cahmaga tjoa. Yu nino sehe mũsa yoaerachũ wacũenoca mũsare buhiri dahreihũa. Yacariro wacũenoca to yacaro sãariro seheta mũsare wacũenoca buhiri dahreihũa. ⁴ Cãina mũsa mehne macaina Sardis macaina ñaare yoarucuina jierara. Wete marieni suhtirore mũsa sãaboriro seheta tí suhtirore mũsa wete piho duaeraro seheta ti ñaa yoaare piha duaerare mũsa. ã noaina jina, yehseri suhtiro sãaina yũhũ mehne tininahca mũsa sehe. ã yoahtina cjihti jira mũsa. ⁵ Jipihtina yu yare duhueraina ãta yehsea suhti sãaina jiahca. ã yoa yũhũ mehne ã jirucuhtina ti wamare to joa õri pũi tina cũhũ ti wamare joa õina jiahca. Ti wamare to joa õrire pahã cohãsi yũhũ. Yu Pũcu to ñũrocaroi, anjoa cũhũ ti ñũrocaroi yu yaina mũsa jirire yahuihtũa tinare. ⁶ Cahmori tiina jira mũsa. ã jina mũsa ya curuari macainare yu yainare Espĩritu Santo to yahurire tũhoga mũsa”, ni joarocaga Sardis macaina yu yainare, ti puhtoro cũhure.

Filadelfia macainare Jesu yainare joaroca dutiha Joãore

⁷ Filadelfia macaina yu yaina, ti puhtoro cũhure õ sehe ni joarocaga mũhũ: “Yũhũ ñaa marieriro jija. Yu nino seheta yoariro jija. Davi cjiro panopũ macariro puhtoro dutiriro waro sawire cjuariro jiro masare to dutiriro seheta tuaa mehne dutiitũa yũhũ cũhũ. Tí tuaa mehne yu yoa dutichũ ne paina tíre dũcata masierara. Yu yoa dutierachũ ne paina tíre yoa masierara. ⁸ Jipihtiare mũsa yoaare masija yũhũ. Wacũ tuaera cureina jipanahta yu buheare noano tũho, tíre ne duhuerare mũsa. ã jicu yu yare cũi mũsare tíre buhe duticu. ã jia paina

‘Tíre buhena tjiga’, ni ducata masierara mūsare. **9** Ñ jicū ò sehe yoaihtja: Paina mūsa cahai jiina Satana yaina jira. ‘Judio masa jija’, nipahta judio masa waro jierara. Tinare mūsa panoi na tuhcuca caha sū mūsare ño payochū yoaihtja tinare. Yū ã yoachū ñūa mūsare yū cahīare masiahca tina. **10** Mūsare yū yare yū duhu dutierachū tūhona noano yūhtire mūsa. Mūsa ã yoachū ñūcū ahri yahpa macaina jipihtina ti ñano yūhdūhti pja jichū mūsare ducataihtja mūsa ñano yūhdūerahto sehe. Tí pja jipihtina ti ñano yūhdūhti pja jirohca. **11** Mahanocā dūhsara ahri yahrapū yū tjua tahto. Yū yare mūsa masirire boena tjiga. Ñ yoa yūhūre ã yūhtirucuga, mūsa noano yoari wapare ‘Butiri’, nina. **12** Ñ jicū yū yare ã yoarucuinare yū Pūcū ya wūhū macaina cjihtire cūihtja tinare. To ya wūhū macaa botari ti yoari pja ti jirucuro seheta Cohamacū mehne jirucuchū yoaihtja tinare. Ñ jia Cohamacū mehne macaina ã jirucuahca. Ñ jicū Cohamacū wūhū macaa botaripū yū joa òno seheta tinare ti pjacūripū ò sehe ni joa òihtja: Cohamacū yū Pūcū wamare, to ya maca wama cūhūre joa òihtja. To ya maca wahma maca Jerusalē jirohca. Tí maca mūanopū Cohamacū cahapū tari maca jirohca. Yūhū wahma wama cūaihca. Tí wama cūhūre joa òihtja ti pjacūripū. **13** Cahmori tiina jira mūsa. Ñ jina mūsa ya curuari macainare yū yainare Espíritu Santo to yahurire tūhoga mūsa”, ni joarocaga Filadelfia macaina yū yainare, ti pūhtoro cūhūre.

Laodicea macainare Jesu yainare joaroca dutiha Joāore

14 ‘Laodicea macaina yū yainare, ti pūhtoro cūhūre ò sehe ni joarocaga mūhū: “Yūhū Cohamacū jipihtia to yoarire, to yoahiti cūhūre yoa sohtori tiriro jija. Yūhū potocā yoariro jija. Ñ jicū mahñono marieno yū ñūrire ã yahurucuriro jija. Jipihtiare yū Pūcū to yoarire yoabasariro jija yūhū. **15** Jipihtia mūsa dohse yoarire masija yūhū. Yūhūre wacū tuaina jipanahta mahanocā wacū tuaina jira mūsa. Ò sehe jira tí: Co yūshera co sū mehne pjiroca si putia co yoaro sehe jira mūsa. Tó sehe jia core mari ji coeraro seheta yūhūre wacū tuaera cureina mūsa jichū yūhū cūhū mūsare ji coeraja. Yūhūre mūsa noano wacū tuachū noaboa yūhūre. Yūhūre mūsa wacū tuaerachū ña niboa yūhūre. Yūhūre mūsa wacū tuaerari yūhdoro mahanocā wacū tuaina mūsa jichū ña yūhdūara. **16** Mūsa ã jichū ñūcū ñū yabi yūhdūaja yūhū. Ñaa core yū cho cohāno seheta yūhūre

mahanocã wacũ tuinare ñu yabi yũhduaja yũhu. 17 Ñ jina õ sehe ni tũhotumana mũa: ‘Jipihtiare cjuaja. Ne yaba duhsaerara marine’, ni tũhotumana mũa. Ñ nipanahta pjasuoina yoaro sehe jira mũa. Ñ jina capari ñueraina ti ñu duaare ti masieraro seheta Cohamacu yare ne masierara mũa. Ñ jina suhti marieina ti buo tiro seheta Cohamacu to ñurocaroi mũa ñaa yoarire buo tihtina jira mũa. 18 Mũa ã jiina jichu ñucu õ sehe ni yahuihtja mũsare: Uru warore mũa nuchuboro seheta noaare yu cjuaaare naga mũa. Mũsare yũhure wacũ tuachu yoaihtja. Ñ jina potocãta Cohamacu ya mehne pjiro cjuanahca. Ñ yoa yehseri suhtirore mũa nuchu mũa sãano seheta yu di cohãri mehne yu yariaro mehne mũa ñaa yoaare cosawerina jiga. Ñ yoana noaa suhti sãaina ti buo tieraro seheta mũa ñaare cosawerina jina buo tisi mũa cũhu. Ñ yoa mũa caparire mũa co tiri baharo noano mũsare bajuro seheta Cohamacu yare noano tũhoga, mũa noano masihto sehe. 19 Jipihtina yu cahĩnare yahuja. Ñ jicu yu cahĩina ti jichu ñucu, ti tũhoerachu tinare quihõno yoa dutija, tinare yoadohocu tacu. Ñ jina yu ya sehere tuaro cahmaga. Ñ yoa mũa ñaare tũhotumari cjirire cohtota, tí ñaare duhuga. 20 Tũhoga yũhure. Mũa wũhure bihari wũhure yu sũruca yu sãa dua yu pisurucuboro seheta, mũa mehne macariro ji duai nija. Yu ã ji duachu tũhoina jina yũhure mũa mehne ji dutiga. Yu yaina jiga. Mũa ã ji dutichu mũa mehne jiihtja. Ñ jicu mari sũho chũro seheta mũa mehne noano jiihtja. Ñ jina yũhu mehne macaina jinahca mũa. 21 Watĩnore yu yũhdũrucari baharo yu Pũcu pũhtoro to dujiro cahai dujija, yũhu cũhu duticu tacu. Tó seheta mũa cũhu ñaa yoarire mũa yũhdũrucari baharo yu pũhtoro dujiro cahai dujinahca, mũa cũhu dutina tana. Mũsare yu cahai dujichu yoaihtja. 22 Cahmori tiina jira mũa. Ñ jina mũa ya curuari macainare yu yainare Espĩritu Santo to yahurire tũhoga mũa”, ni joarocaga Laodicea macaina yu yainare, ti pũhtoro cũhure —nihre yũhure joa dutiriro.

**Muanopu Cohamacure na tuhcu
caha su ti ño payoare ñuha João**

4 1 Yũhure to ã ni yahuri baharo muanopu pjõari sopacare ñuhi. Pari turi corneta to tuaro bisiro seheta tuaro durucua bisiro coa tahre yu tũhochu. Õ sehe nihre yu tũhochu:

—Ōpɛ mɛja taga. Ahri yɛ yahuhti cjihti baharopɛre wahahtore mɛhɛre ñoihtja. Yɛ niriro seheta ã waharohca —nino coa tahre mɛanopɛ.

² To ã ni yahuchɛta tópɛ mɛja sɛɛ Espíritu Santo tuaa mehne ñɛi nihi. ã jicɛ pɛhtoro dujirore mɛanopɛ ñɛhi. Tóí cɛiro dujihre. ³ Noano si siteriro dujihre. Diamante wama tia tãa yoaro seheta, rubí wama tia tãa yoaro seheta noano si siteriro dujihre tiro. ã jiro buhini soro esmeralda yoaro sehe si siteri soro dacho macai dujihre tiro. ⁴ ã yoa to dujiro cahai veinticuatro dujiare ñɛhi. Tí dujia pɛhtoa dujia yɛ ñɛ mɛhtarirore duji soroahre. Tí dujiapɛ veinticuatro Jesu yaina pɛhtoa dujihre. Yehsea suhti tiina jihre. ã yoa pɛhtoa ti pisaa sorori uru sororire pisaina jihre tina. ⁵ Yɛ ñɛ mɛhtariro dujiroi orocasitehre. ã yoa soro sehe jiro choro bisiro coa tahre. Wɛpo cɛhɛ bisiro coa tahre. Tí dujiro panoi siete sihãa poca jihre. Siete sihãa poca mehne to piti dahre buhechɛ Cohamacɛ yaina siete pjacɛ bajueraina jihre. ⁶ ã yoa to dujiro panoi pjiri ma yoaro sehe vidro yoaro sehe sipari ma jihre. Noano co sitiri ma yoaro sehe jihre.

Ti dujiro cahai pititiaro soro sehe bajuina jihre. Ti pjacɛri panoi ti baharo bɛhɛsehe cɛhɛre payɛ capari tiina jihre tina. ⁷ Yɛ ñɛ mɛhtariro soro bajuriro yairo sohãriro yoaro sehe bajuhre. To baharo jiriro wachɛ yoaro sehe bajuhre. Ti baharo jiriro masɛno wɛhdɛa sehe wɛhdɛa tiriro jihre. Tina tiaro baharo jiriro cja to cɛmɛadɛpɛrɛre saño dujiriro yoaro sehe bajuhre. ⁸ Tina seis dɛpɛri wɛa dɛpɛri tiina jihre. ã jia ti wɛa dɛpɛri pɛ bɛhɛseheripɛta payɛ capari tia dɛpɛri jihre. ã yoa dachoripe, ñaminipe ã durucua nihre. Ne durucu duhuerare. Ō sehe ni durucuhre:

“Noariro, noariro, noariro Cohamacɛ mari pɛhtoro tua yɛhdɛariro jira.

Tiro panopɛta ã jirucua tiri jire.

Mipɛ cɛhɛre ã jirucura.

Baharopɛ tarohca”,

ni durucurucua nihre.

⁹ ã ni durucua tina pititiaro soro bajuina to tuaare durucua nihre pɛhtoro dujiroi dujirirore. ã durucua, tire jipihitia dachoripe jirucurirore wahche payoa “Noana”, nia nihre.

¹⁰ Ti ã yoa payochɛ ñɛa veinticuatro Jesu yaina pɛhtoa sehe pɛhtoro dujiroi dujiriro panoi na tuhɛa caha sɛ, tire ño

payohre. Tiro jipihtia dachoripe jirucuriro jira. Ñ ño payoa ti pũthoa pisaa sororire to dujiro panoi doca payohre. Ñ doca payoa ò sehe nihre tina:

11 “Mũhũ Cohamacũ sã pũthoro waro jira.

Tuariro, noariro jira mũhũ.

Mũhũ sã ño payoriro jii nina.

Mũhũre ã ño payorucuro cahmana sãre.

Jipihtiare bajuamehneriro jira mũhũ.

Mũ cahmariro seheta tí jipihtiare bajuamehnea tiri jire mũhũ”,

nihre tina Cohamacũre, tói dujirirore.

Joari pũre turēri tiare cordero cũhũre yahuha João

5 1 Baharo tói dujiriro to wamomaca poto bũhũsehei to cjuari pũre joari pũre ñũhi. Tí pũ pũ bũhũseheri to joari pũ to turēri tia jihre. Ñ yoa siete wihtã ñahaah mehne to wihtã ñahari tia jihre. 2 Tí tiare turēri tiare ñũ tuhsũ, tuariro anjore ñũhi. Tiro tuaro durucua mehne ò sehe ni yahuhre:

—¿Ahri tiare wihtã ñahaare pahrēboriro ñaa buhiri marieriro diro sehe jijari, mũsa tũhotuchũ? —nihre tiro anjo.

3 Ñ niparota tí tiare pahrēhtirore bocaerare. Mũanopũ, ahri yahpũ, catiina watoi, yaria tuhsũina watoi ne tí tiare ñahaare pahrēhtiro mariahre. Ñ jiro tí tiare buhehtiro mariahre. 4 Ñ jicũ pahrēhtirore, tí pũre ñũhtirore ti bocaerachũ ñũcũ tuaro tiuhi yũhũ. 5 Yũ ã tiichũ ñũno cũiro Jesu yaina pũthoa mehne macariro ò sehe nihre yũhũre:

—Tiiecũ tjiiga. Tí tiare ñahaare cũiro pahrē masina. Tiro Juda ya curua macariro tuariro jira. Tuariro jiro “Yairo sohãriro”, ti ni pisuriro jira. Tiro pũthoro Davi panamino ji turiariro jira. Watĩnore yũhdũrucariro jira tiro. Ñ jiro tiro tí tiare siete ñahaare pahrē masiriro jira —nihre tiro yũhũre.

6 To ã nichũ tũhocũ pũthoro dujiro panoi cordero to ducuchũ ñũhi. Cuatro soro bajuina, Jesu yaina pũthoa tina watoi ducuhre tiro cordero. Tiro ti wajãriro cjiro sehe bajuhre. Siete sahari tiriro, siete capari tiriro jihre. Tí siete sahari ã yoa siete capari mehne to piti dahre buhechũ Cohamacũ yaina pjacũ bajueraina siete bajueraina yoaro sehe jira. Tina to yaina pjacũ bajueraina jipihtiro ahri yahpũ Cohamacũ to warocarina jihre. 7 Ñ jiro cordero sehe pũthoro dujiro cahapũ sũro, tirore to poto bũhũsehei to cjuari tiare tuãwe nahre. 8 To

ã tããwe nachu ñua cuatro soro bajuina, veinticuatro pũtoa cũhu cordero panoi na tuhcuca caha su, tireore ño payohre. Tina pũtoa jipihtina arpa wama tia buapũtẽare, uru wahwari cũhure cjũahre. Tí wahwari incienso noano wahpaa posa tia wahwari jihre. Tí incienso mehne to piti dahre buhechu Cohamacu yaina tireore ti sini payori yoaro sehe jihre.
9-10 ã tireore ño payoa õ sehe ni wahmaa basaare tina basa payohre tireore:

“Mũhu ti wajãriro cjiro jira.

ã jicu mu di cohãri mehne sã ñaa yoari buhirire
cohãre mũhu Cohamacu yaina sã jihto sehe.

ã jicu jipihtia curuari macainare cãinare, jipihtia dũseri durucuinare cãinare, jipihtia yahpari macainare cãinare sã ñaa yoari buhirire mu di cohãri mehne cosawere mũhu Cohamacu yaina sã jihto sehe.

Sãre jipihtinare Cohamacu yaina cjihtire cũre mũhu.

ã jicu sacerdotea cũhure mũhu sãre Cohamacure dahra cohtaina sã jihto sehe.

ã yoacũ ahri yahpa macaina bui pũtoa sõhre mũhu sãre.

ã yoariro jicu tí tiare wihtã ñahaare pahrẽhtiro jira mũhu”,

ni basa payohre tina corderore.

11 Pari turi ñucũ millones anjoa perire ñũhi. Pũtoro dujirore cuatro soro bajuinare, veinticuatro pũtoare anjoa sehe tina soroa dũcu sũhre. Tina anjoa peri tuaro ti sañurucu payochũ ñũhi. 12 Õ sehe ni tuaro sañurucu payohre tina:

“Cordero ti wajãriro mũhu jipihtinare dutiriro, jipihtiare cjũariro, masi pahñoriro, tua yũhdũariro jira mũhu.

Masa ti ñaa buhiri ti wajãriro mu jichũ ñũna ã ni ño payoja mũhure.

‘Noabiariro jira’, ninahca mũhure.

Mũhure noano durucunahca”,

ni sañurucu payohre anjoa peri.

13 ã jicu paina cũhure ti sañurucu payoa coa tachũ tũhohi. Jipihtina mũano macaina, ahri yahpa macaina, catiina, yariaina cahapũ jiina cũhu, pjiri ma macaina, jipihtiropũ jiina õ sehe ni durucu payoa coa tahre:

“Cohamacure to dujiropu dujirirore, Cordero cūhure
mūsare puarore noano durucunahca.
Mūsare wahche payonahca.

‘Noa Yūhdūaina, Tua Yūhdūaina jira’ nina,
jipihtia dachoripe ã nirucunahca mūsare”,

ni durucu payoa coa tahre.

14 Æ jia tina cuatro soro bajuina ti ã durucu payochu tūhoa
“Æta ni durucu payojaro”, nihre. Æ jia Jesu yaina pūhtoa sehe
na tuhcuca caha sū Cohamacure, Cordero cūhure ño payohre.

Papera tiare to nari tiare wihtã ñaharire pahrēna Cordero

6 1 Baharo papera tiare to nari tiare Cordero wihtã ñaha
mūhtanore pahrēhre. To ã pahrēchu ñūhi. To ã pahrēri
baharo cūiro soro bajuina mehne macariro, “Ñūna taga”, nihre.
Æ nino wapo yoaro sehe bisihre tiro.

2 To ã niri baharo ñūhi yūhu. Yehseriro cawalore ñūhi.
Tiro bui pisariro buedure cjuahre. Tirore pūhtoro pisari sorore
wahre paio sehe. To ã wari baharo tiro sehe tirore ñū tuhtiinare
yūhdurucaro wahahre.

3 Baharo cū wihtã ñahanore pahrē tuhsu Cordero pa wihtã
ñahanore pahrēhre tjoa. To ã pahrēri baharo paio soro bajuina
mehne macariro “Ñūna taga”, to nichu tūhohi tjoa.

4 Æ jicu paio cawalore sohārirore ñūhi tjoa. Tiro bui
pisarirore tuaare wahre paio sehe. Ahri yahpa macainare
cahma wajã dutihtirore cūhre tirore. Æ jia jipihtiro macaina
cahma wajāahca ahri yahparu. Æ yoa pjiri pjī ñosari pjīne
wahre tirore.

5 Baharo puarore pahrē tuhsu Cordero parore pahrēhre tjoa.
Æ jicu puaro ti durucuri baharo paio soro bajuina mehne
macariro “Ñūna taga”, to nichu tūhohi.

To ã niri baharo ñiriuro cawalore ñūhi. Tiro bui pisariro
balanza quihōnore cjuahre. 6 Tirore yu ñuri baharo soro bajuina
watoi õ sehe nino coa tahre:

—Cū dacho dahrari wapa mehne trigore cū kilota nuchuahca
masa. Cū dacho dahrari wapa mehne cebada wama tia yaparire
tia kilota nuchuahca masa. (Trigo, cebada cūhu pihtia wahaahca.
Æ jia tí wapa bju niahca.) Wiho mejeta chūa dahrea sere,
vino cūhure dojochu yoaena tjiga —nino coa tahre.

7 Baharo tiarore pahrē tuhsu Cordero parore pahrēhre tjoa. To ã pahrēri baharo pairo soro bajuina mehne macariro ji bato tiriro “Ñuna taga”, nihre tjoa.

8 To ã nichu tuhocu wapoariro cawalore ñuhi. Tiro bui pisariro “Yariachu yoariro” wama tihre. Ñ yoa to baharo tariro “Yariaina ti jiro” wama tihre. Ñ jiro tinare tuaare wahre pairo sehe. Ahri yahpapure cuarta parte* masare wajã dutihre. Cahma wajãa mehne, juca baa mehne, dohatia mehne, wahiquina nucuiri macaina suaina mehne tópeina masare ti wajãhtore cūhre tinare.

9 Baharo pititiaro wihtã ñahaare pahrē tuhsu Cordero paro ñahanore pahrēhre tjoa. To ã pahrēchu altar docai Jesu yaina ti wajãrina ti catiri yajeripohnarine ñuhi. Cohamacu yare ti yahuri buhiri, “Jesu yaina jija”, ti ni yahuri buhiri tinare wajãri jire. 10 Tina sañurucua ò sehe nihre Cohamacure:

—Muhu sã pãhtoro, ñaa marieriro, mahñoño marieno, mu niriro seheta yoariro jira muhu. ¿Ahri yahpa macainare, sãre wajãrinare dohse jichu buhiri dahreihcari muhu? —ni sañurucuhre tina.

11 Ñ jiro tinare yehsea suhti yoaa suhtire wahre. Tinare ã waro ò sehe nihre tinare:

—Sosiniga. Paina musa coyea Jesu yaina musa yoariro seheta mipu cūhure noaa buheare buhesinia nina. Musare ti wajãriro seheta tina cūhure ti wajã pahñohto dũhsasinina. Ñ jina tinare jipihtinare ti wajãhto pano mahanocã sosiniga musa —nihre tinare.

12 Baharo cinco wihtã ñahaare pahrē tuhsu Cordero paro wihtã ñahanore pahrēhre tjoa. Tóre to ã pahrēchuta tuaro yahpa ñuhmihre. To ñuhmini baharo sũ dacho macariro ñiriro choro wahahre. Ñiri suhtiro yoaro seheta ñiriro choro wahahre. Ñ yoa sũ ñami macariro di yoaro sehe sohãriro wahahre.

13 Ñ yoa ñahpichoha poca yahpapu boraahahre. Yucucu dica yahsaare wihnono to wã bure bororo seheta ñahpichoha poca boraahahre. 14 Ti ã wahari baharo mũano butia wahahre. Papera tiare mari turēchu to bajueraro seheta

* ‘Una cuarta parte’ noho puro to jirore masi duana ò sehe masinahca: Ahri yahpa macaina dacho macai jiina ‘una media parte’ jira. ‘Una media parte’ pari turi dacho macai jĩinare mari quihõchu, títa jira ‘una cuarta parte’.

bajuerare m̄ano. Ñ yoa jipihtia t̄yuc̄u c̄uh̄u n̄soro c̄uh̄u pa seher̄u s̄ur̄cah̄re. **15** To ã wahach̄u ñ̄ua, ahri yahpa macaina bui p̄h̄toa coparip̄u t̄yuc̄u macaa t̄aa docap̄u c̄uh̄ure duhtih̄re. Paina p̄h̄toa, surara p̄h̄toa, pache p̄ua, tuaina, jipihtina tinare dahra cohtaina, dahra cohtaina jieraina c̄uh̄u t̄oihta duhtimah̄re. **16** Ñ duhtia t̄yuc̄ure, t̄aa c̄uh̄ure ò sehe nihre:

—Sã bui bora pjaga. Sãre n̄oga. Siro p̄h̄torore to dujiroi dujirirore cui ȳh̄duaja. Cordero suaro, sãre ñ̄ano buhiri dahrerohca. “Ñ buhiri dahreri”, nina n̄oga sãre. **17** Jipihtinare tuaro ti buhiri dahrehti dacho ji tuhs̄ura. Ñ jia ti buhiri dahrehtore ne c̄airo duhtiro bihoeraro, c̄ano pjasi —nihre tina jipihtina.

Israe masa pjac̄ure Cohamac̄u to wama ñ̄a òhtore yahuha Joã

7 **1** Baharo pititiaro anjoare ñ̄ahi. Tina jipihtirop̄u wahahre. C̄airo nortep̄u waharo t̄op̄u tari wihtonore taerach̄u yoahre. Pairo surp̄u, paio s̄u m̄uja tarop̄u, paio s̄u s̄ãanop̄u wahahre. Nortep̄u wahariro yoaro sehet̄a yoahre tina c̄uh̄u. Ñ jiro ahri yahrap̄u, pjiri map̄u c̄uh̄ure ne wihtonore taerare. Ne c̄udu yuc̄ure wihtonore wã ñ̄uhmich̄u yoerare. **2** Ñ yoa paio anjore ñ̄ahi t̄joa. S̄u m̄uja tarop̄u taro nihre tiro. Cohamac̄u catihiro to wama ñ̄a ònore na taro nihre tiro. Ñ na taro paina pititiaro anjoare tiro sañurucuh̄re. Tina anjoa sehe ahri yahpare, pjiri ma c̄uh̄ure Cohamac̄u to dojomehne dutiina jihre. **3** Tinare sañurucuro ò sehe nihre anjo:

—Cohtasiniga. Cohamac̄ure dahra cohtaina ti w̄h̄duã pocare to wamare òna tana nija. Sã ã òhto pano ahri yahpare, pjiri mare, yuc̄uri c̄uh̄ure dojomehnesiniena t̄jiga m̄usa —nihre tiro paina pititiaro anjoare.

4 Ñ jiro Cohamac̄u to wama mehne ti w̄h̄duã pocare ti òhtinare “Òpeina jira”, ni yahuhre ȳh̄ure c̄airo. Israe masa doce curuari macaina ciento cuarenta y cuatro mil masa ti òhtina jiyuhti. **5** Ahrina jiyuhti ti òhtina: Doce mil masa Juda panamana ji turiana ti òhtina jihre. Paina doce mil masa Rubẽ panamana ji turiana ti òhtina jihre. Paina doce mil masa Gad panamana ji turiana ti òhtina jihre. **6** Paina doce mil masa Aser panamana ji turiana, paina doce mil masa Neftalĩ panamana ji turiana, paina doce mil masa Manase

panamana ji turiaina ti õhtina jihre. **7** Paina doce mil masa Simeo panamana ji turiaina, paina doce mil masa Leví panamana ji turiaina, paina doce mil masa Isacar panamana ji turiaina ti õhtina jihre. **8** Paina doce mil masa Zabulõ panamana ji turiaina, paina doce mil masa José panamana ji turiaina, paina doce mil masa Benjami panamana ji turiaina ti õhtina jihre. Tópeinata jipihtina masa ciento cuarenta y cuatro mil to wama mehne ti õhtina jihre.

Payu yehsea suhti tiinare yahuha João marine

9 Baharo payu masare ñhi. Jipihtia yahpari macainare, jipihtia curuari macainare, jipihtia duseri durucuinare, jipihtia macari macainare cainare Cristore cahmaina dihtare tói ducuinare ñhi. Pũtoro to dujiro panoi, Cordero panoi ducuhre tina masa. Payu masa jihre. Ñ jia quihõ bihoina jierare. Yehsea suhti tiina jihre tina. Ñ yoa pjaa põ pũrine cjuahre. **10** Ñ jia tina jipihtina õ sehe ni tuaro sañurucuhre:

“Cohamacu jira sãre yũdũchu yoariro.

Tiro to dujiroi dujiriro jira.

Cordero cũhu sãre yũdũchu yoariro jira”,

ni sañurucuhre tina. **11** Ñ jia jipihtina anjoa, Jesu yaina pũtoa cũhu, soro bajuina mehne pũtoro to dujiro cahai ducuhre. Ñ ducua to dujiro panoi doca caha su, Cohamacure wahche payohre. **12** Õ sehe ni wahche payohre tina:

“Ñ tjira.

Cohamacu sã pũtoro mũhure noano durucuja.

Noa yũdũariro, masi pahñoriro jira mũhu.

Mũhure ‘Noana’, nija.

Mũhure ño payoja.

Tua yũdũariro jira mũhu.

Mu tuaa mehne yoariro jira mũhu.

Tó seheta jirucuriro jira mũhu jipihtia dachoripe.

Ñ tjira”,

ni wahche payohre tina.

13 Ti ã nichu tũhoro cũiro Jesu yaina pũtoa mehne macariro yũhure õ sehe ni sinituhre:

—¿Ahrina yehsea suhti tiinare masijari mũhu? ¿Ti tarirore masijari mũhu? —ni sinitu ñhure yũhure.

14 To ã nichu tũhocu:

—Masieraja —ni yũthi.

—¿Noa jijari tina? —ni sinituhi tirore.

Yũ ã nichũ tũhoro õ sehe nihre yũhũre:

—Ahrina ñabiario yũhdũri dacho jichũ cũno pjaina jira.

Ti suhti cosawerina ti jiro seheta Cordero to di cohãno mehne ti ñaa buhirire cosawerina jira. Ñ jia noano yehsea suhti tiina jira. ¹⁵ Ñ to cosawerina jia Cohamacũ to dujiro panoi tirore ã ño payorucura. Dachoripe, ñaminipe tirore ã ño payorucura, sacerdotea Cohamacũ wũhũi ti yoariro seheta. Ñ jiro tina mehne ã jirucuro, tinare yoadohorohca Cohamacũ “Soro wahari”, nino. ¹⁶ Ne pari turi jũca baasi tina. Ñ jia ñahma yapiosi tina. Ne sũ dacho macariro siro tinare ne jũ pjasi. Tuaro sia tinare ñano yũhdũchũ yoasi. ¹⁷ Pũhtoro dujiro potoi ducuriro Cordero tinare ñũ wihborohca. Ovejare ñũ wihboriro yoaro sehe tinare ñũ wihborohca. Ñ ñũ wihboro mări pohtaripũ catichũ yoaa mări pohtaripũ tinare mũ tã wahcãnohca, ovejare ñũ wihboriro to mũ tãno seheta. Ñ yoaro ã wahcherucuchũ yoarohca tinare. Ñ jia ne pari turi tiisi tina —ni yahuhre Jesu yaina pũhtoa mehne macariro yũhũre.

Seis papera ti wihtã ñahaare pahrẽ tuhsũro parore pahrẽha Cordero

8 ¹ Seis papera ti wihtã ñahaare pahrẽ tuhsũro parore pahrẽhre tjoa Cordero. To ã pahrẽ tuhsũchũ cũ hora dacho macai tórpũ mũanopũ noano dihta marieaa wahahre. ² To ã wahari baharo siete anjoare Cohamacũ panoi ducuinare ñũhi. Tinare siete cornetarire wahre paio. ³ Pairo anjo uru wahware inciensore posa tihti wahware cjuariro altar cahapũ sũ, ducuhre. Tói to ducuchũ payũ inciensore tirore wahre, jipihtina Cohamacũ yaina tirore ti siniri mehne morehtire. Ñ jiro uru altarpũ Cohamacũ to dujiro panoi jiri altarpũ tí inciensore jũ mũohre Cohacũre. ⁴ Ñ jia anjo to cjuari wahwa macaa inciensore altarpũ to poho siteri baharo tí incienso macaa me Cohamacũ yaina tirore ti siniri mehne mũjaa wahahre. ⁵ Ñ wahari baharo altar macaa niti mehne tí wahwa wahpa wahachũ, yahpai poho cũnocahre. To ã poho cũnocachũta wũro pja, soro sehe jiro bisi mũa, oroca site mũa, yahpa ñũhmi mũahre.

Cornetarire yahuha João

6 Baharo siete anjoa cãina ti cornetarire putia taa nihre.

7 Cãiro anjo to yariare puti mũhtahre. To ã putichũ co poca yũsũa poca pichaca mehne, di mehne morea poca yahpapũ bora sũ cahahre. Ti bora sũ cahachũta yahpa jũa wahahre. Õ puro jũhre: Ahri yahpa dacho maca sũro caharoi jũa wahahre. Æ jiro tó puro posata yucũri cũhũ jũa wahahre. Tó puro posata tja cũhũ jũa wahahre.

8 Anjo cãiro to ã puti mũhtari baharo paio anjo to yaria cornetare putihre tjoa. To ã putichũ pjidũ tũcũ yoaro sehe bajudũ noano jũrucudũ pjiri mapũre waharoca ñojaa wahahre. Æ jiro yahpa to jũriro puro tó purota pjiri ma di ma dojoa wahahre. 9 Æ jia pjiri ma macaina wahi dacho maca mahano sũboro waroi yariaa wahahre. Tópe bũsota dohoa bũso cũhũ minia wahahre pjiri mapũre.

10 Pũaro anjoa ti putiri baharo paio anjo cũhũ to yaria cornetare putihre tjoa. To ã putichũ pjiria ñahpichohaca, sihãria yoaro sehe siria yahpapũ bora sũ cahaa wahahre. Ahri yahpa macaa mári dacho macabo cureroi tópe mári bui bora sũ cahaa wahahre ñahpichohaca. Tópe co wijaa copari bui cũhũre bora sũ cahaa wahahre. 11 Tópe márita suẽa mári wahahre. To ã wahachũ payũ masa tí mári macaa core, tí copari macaa co cũhũre sihnimaa, yariaa wahahre. Tia ñahpichohaca “Suẽnia”, wama tihre.

12 Tiaro anjoa ti putiri baharo paio anjo cũhũ to yaria cornetare putihre tjoa. To ã putichũ sũ dacho macariro, ñami macariro cũhũ dacho maca sũboro waroi dojoa wahahre. Ñahpichoha peri cũhũ dacho maca sũboro waroi jia poca tópe pocata dojoa wahahre. Tópe poca mũano macaa poca noano buhrierare. Dachopũ pititia horari waro sũ dacho macariro ne buhrierare. Ñamine pititia horari waro sũ ñami macariro, ñahpichoha poca cũhũ ne buhrierare.

13 Baharo ñũroca mũohi tjoa. Mũanopũ wũrirore cjare ñũhi. Æ jicũ to sañurucuchũ tũhohi. Õ sehe nihre tiro:

—Ñabiara. Ñabiara. Tiaro anjoa mipũ putierasiniina ti putiri baharo pinihtare ñabiario waharohca. To ã wahachũ ahri yahpai jiina ñabiario yũhdũahca —nihre tiro.

9 ¹ Baharo pititiaro anjoa ti putiri baharo paio anjo to yaria cornetare putihre tjoa. To ã putichũ ñahpichohaca yoaro sehe jiro anjo muanopũ bora tarirore ñũhi. Yũ ã ñũno watoi tirore cũari copa macari sawire wahre. ² ã jiro tiro tí copare to pjõochũ pichaca me wijaahre. Pjiri pichaca macaa me yoaro seheta pjiro me wijaahre tí copare. ã wijaaro tí me dóihta sũ dacho macarirore, mũano cũhure butia wahachũ yoahre. ³ ã yoa tí me puhichai jiina poreroa yahpapũ tahre. Pichõno soroa ti tuaro purĩno seheta tina cũhũ tuaro purĩhre. ⁴ ã jiro tjare, yucũire, paye toaare ñano yoa dutierare tinare. Masa dihtare ñano yoa dutihre tinare. Cohamacũ to wamare ti wũhdũa pocare õmahnoeraina dihtare ñano yoa dutihre tinare poreroare. ⁵ ã ñano yoa dutiparota tinare wajã dutierare. Tinare wajã dutieraparota cinco sũri waro tinare ñano purĩchũ yoa dutihre. Pichõno soroa tjoaa ti purĩno seheta purĩchũ yoaina jihre poreroa cũhũ. ⁶ Tinare ti ã purĩchũ yoachũ masa yariaa waha duaahca. Ti ã yaria duapachũta tinare yaria dutisi.

⁷ Poreroa sehe cawaloa yoaro sehe bajuhre. Ti cahma wajãhto pano cawaloare ti suhti sãariro seheta tó seheta bajuina jihre tina poreroa cũhũ. Ti dapu pocai pũhtoa ti pisaa sorori uru sorori yoaro sehe bajuhre. Ti wũhdũa poca masa yoaro sehe bajuhre. ⁸ Ti pjoari numia pjoari yoaro sehe jihre. ã yoa ti piri yaya piri yoaro sehe jihre. ⁹ Pẽ buhu dũcatari cahsaro comaa cahsaro yoaro sehe bajuhre ti cutiro. ã yoa tina ti wũchũ payũ cawaloa mũrocaina ti mũrocaro sehe ti wũa dũpũri bisihre. Cawaloa tunua bũsore wajaina ti cahma wajãnopũ waha, ti bisiro seheta bisihre poreroa wũa dũpũri. ¹⁰ ã yoa pichõno soroa ti pichõno tiro seheta, tjoariaca ti cjuaro seheta jihre tina poreroa. Ti pichõri mehne tjoaa, cinco sũri waro masare purĩchũ yoahre. ¹¹ Tina pũhtoro cjuaina jihre. Cũari copa pũro jihre ti pũhtoro. Tiro anjo jihre. Hebreo ya mehne Abadón wama tihre tiro. Griego ya mehne Apolión wama tihre. (Apolión “Pihtichũ yoariro”, nino nina.)

¹² Poreroa masare ñano ti purĩno yoari baharo ahri ti ñano yũhdũ mũhtariro cjiro pihtia wahahre. Tó baharo pũa taha pari turi ñano yũhdũsiniahca masa.

¹³ Baharo cẽ wamomaca pihtiina anjoa ti putiri baharo paio anjo to yaria cornetare putihre tjoa. To ã putichũ Cohamacũ panoi ducuri altarpũ uru altarpũ durucua bisi wijaro coa tahre. Tí altar macaa sahari pititia saharipũ durucua bisi

wijaro coa tahre. **14** Ñ durucuro cornetare putiriro anjore yahuhre:

—Eufrates wama tiri ma pjiri mapu peresupu jiiinare anjoare wioga. Tina pititiaro anjoa jira —nino coa tahre.

15 Ñ nino coa tachu tuhoro anjo sehe tinare pititiarore wiohre, payu masare wajähtinare. Ahri horare, ahri dachore, ahri süre, ahri cühmare quihõno cohtaa nihre tina pititiaro anjoa. Ti cohtariro mu sura. Ñ jia wajäa taa nina. Jipihtina dacho maca doca curero masare wajäahca. **16** Ñ yoa ti surarare “Õpeina jira”, ti nichu tuhohi. Tina cawaloa bui pisaina jihre. Doscientos millones surara jihre.

17 Ñ yoa cawaloare tina bui pisaina cühure ñuhi. Tina cawaloa bui pisaina ti pē buhure ducataa suhti, comaa suhti, sohãa suhti, yahsaa suhti, ewu sehe bajua suhti jihre. Ñ jia cawaloa ti dapu poca yaya sohãina yoaro sehe bajuhre. Ti duseripu pichaca, me, azufre wama tia me cūhu wijaaahre.

18 Ñ jia cawaloa duseri wijaa masare wajähre. Jipihtina dacho maca mahano suboro waroi tópeina masare wajähre. Pichaca mehne, me mehne, azufre mehne payu masare wajähre.

19 Tina cawaloa ti duseri mehne wajähre. Ñ yoa ti pichõri mehne wajähre tjoa. Ti pichõri sohtoapu agãa dapu poca yoaro sehe bajuhre. Ñ jia ti pichõri mehne ñano yoahre tina masare.

20 Payu masa yariaeraina ti wajä duharina sehe ti ñaa yoarire ne duhuerare. Watiare ño payo duhuerare. “Cohamacu jira”, ti nia masuri cühure ño payo duhuerare. Tí masuri uru mehne, plata mehne, bronce wama tiri comaa mehne, tãa mehne, yucuri mehne ti yoari masuri jihre. Tí masuri sehe ñuerare. Tuhuerare. Tinierare. **21** Paye ñaa cühure tina ne cahyaerare. Masare ti wajärire, numia mehne ti ñano yoarire, ti yacari cühure ne cahyaerare tina. Ñ jia yaya ti yoaro sehe yoaa, tí cühure ne cahyaerare tina.

Mahari tiacãre papera tiacãre na taha anjo

10 **1** Baharo paio tuariro anjo manopu to duji tachu ñuhi. Me curua watoi tahre. Ñ yoa buhini soro to dapu bui pisahre. To wuhduu sũ dacho macariro yoaro sehe si sitehre. To ñuchua pichaca yoaro sehe bajuhre. **2** Ñ yoa mahari tiacã papera tiacãre to pjãri tiacãre cjuhahre tiro. To dahporo poto buhusehe macari dahporo mehne pjiri mapu tu cühre. To

dahporo cō bñhusehe macari dahporo sehe macarocai tñ cñhre. 3 Ñ ducuro yaya ti sañurucuro seheta tiro tuaro sañurucuhre. To ã sañurucuri baharo siete wñpoa yahua coa tamahre. 4 Tí ã yahuchñ tñhocñ joa dñcamahi. Yñ ã joa dñcapachñta mñanopñ yñhñre ò sehe ni durucuro coa tahre:

—Siete wñpoa ti nirire painare yahui tjiga. Ñ jicñ tíre joa nai tjiga —nino coa tahre yñhñre.

5 To ã niri baharo pjiri mapñ ducuriro, macarocai ducuriro anjo to wamomaca poto bñhusehe siðroca mñohre mñanopñ.

6 Ñ siðroca mñono Cohamacñ ã catirucuriro wama mehne wama payohre. Tiro Cohamacñ sehe jipihtiare mñanore, mñano macaare, ahri yahpare, ahri yahpa macaare, pjiri mare, pjiri ma macaare yoariro jira. Ñ wama payoro ò sehe nihre anjo:

—Cohamacñ mehne potocã nii nija. Tó purota cohtanhca. 7 Seis anjoa cornetarire ti putiri baharo paio anjo to putichñ Cohamacñ panopñ “Ñ sehe yoaihtja”, to niriro seheta ã yoarohca. Panopñ masare tíre noano yahuera tiri jire. Baharo tirore dahra cohtainare, to yare yahu mñhtaina sehene noano yahu pahñoa tiri jire tiro. Tí to yahu cñrñre mñpñre yoarohca tiro —nihre anjo.

8 To ã niri baharo mñanopñ yñhñre durucuro coa tariro pari turi durucuro coa tahre tjoa. Ñ sehe nino coa tahre yñhñre:

—Pjiri mápñ ducuriro macarocai ducuriro siro anjo cahapñ wahaga. Ñ wahacñ papera tiacãre to cñjari tiacãre naga —nino coa tahre yñhñre.

9 To ã nino coa tachñ tñhocñ anjo cahapñ wahahi. Tirore papera tiacãre yñ sinichñ tñhoro ò sehe ni yñhtihre yñhñre:

—Naga. Ñ jicñ ahri tia papera tiacãre chñga. Mñ wahma chñchñ mi yoaro sehe noano bisirohca. Mñ pjaropñ mñ bñrori baharo sñëa waharohca —nihre yñhñre.

10 To ã nichñ tñhocñ tí tiacãre anjore yñ nari baharo chñhi. Yñ wahma chñchñ mi yoaro sehe bisihre. Yñ chñ bñrori baharo yñ pjaropñ sñëa wahahre. 11 Yñ ã chñri baharo ò sehe nihre yñhñre:

—Pari turi macari macaina, yahpari macaina, payñ dñseri durucuina, tina bui pñhtoa cñhñ baharo ti dohse wahahtore, Cohamacñ tinare to dohse yoahito cñhñre yahuyuga mñhñ —nihre yñhñre.

P̄aro Cohamac̄u yare yahuhtinare yahu joaha João marine

11 ¹ Baharo ȳh̄ure quihōd̄ure wahre Cohamac̄u. Tjuad̄u puro yoad̄u jihre t̄u. T̄ure waro ò sehe nihre ȳh̄ure: —Ȳu ya w̄h̄ure quihōi wahaga. Tí w̄h̄u macari altar c̄h̄ure quihōga. ã yoa tuhs̄u, tí w̄h̄u ȳh̄ure ño payoinare quihōga. ² Sopaca wija s̄r̄ucari wapare noari wapare quihōi tjiga. Tí wapa ȳh̄ure cahmaerainare ti c̄uri wapa jira. Tina cuarenta y dos s̄uri waro Cohamac̄u ya macare tí maca macaina c̄h̄ure ñano yoaahca. ã jic̄u quihōi tjiga ti ya wapare noari wapare. ³ ã jic̄u ȳu yare yahuinare p̄arore warocaihtja. Mil doscientos sesenta dachori waro ȳu yare yahuahca. Masa ti coyeyo ti yariari baharo ti s̄a suhti barore s̄aina jiahca tina ȳu yahu dutiina —ni yahuhre ȳh̄ure.

⁴ Ahri yahpa macaina bui p̄htoro Cohamac̄u panoi p̄ad̄u Olivo wama tia yuc̄u ducura. P̄ad̄u sih̄a payoa yuc̄u c̄h̄u tí yuc̄u cahai ducura. Tí yuc̄u mehne piti dahre to buhech̄u ahri p̄aro to yare yahuina tí yuc̄u yoaro sehe jira. ⁵ ã jia tinare ñ̄u tuhtiina tinare ti ñano yoa duach̄u tina sehe ti d̄sero macaa picha pohna mehne j̄u pahñoahca tinare ñ̄u tuhtinare. Ò seheta tinare ñano yoinare wajāhca tina p̄aro Cohamac̄u yare yahuina. ⁶ ã yoa tina p̄aro ti coro ta dutierach̄u coro tasi. ã jiro Cohamac̄u yare ti yahuro puro coro tasi. ã jia m̄arine di m̄ari wahach̄u yoaahca tina. ã jia ahri yahpare ñano wahach̄u yoaahca. Jipihtia dohse jiare, jipihtina dohse jiinare masare ñano wahach̄u yoaahca. Ti dohse yoa duaro puro ã ñano wahach̄u yoaahca ahri yahpare. ⁷ Ti ã yoa pahñoch̄u waro c̄ari copap̄u jiriro ñariro n̄c̄u macariro wijaarohca. ã wijaaro Cohamac̄u yare yahuina mehne cahmachenoahca. ã cahmacheno tua ȳhd̄r̄ucaro tinare wajānohca. ⁸ To ã wajāri baharo ti p̄ac̄uri cjiri p̄jiri maca macari mahap̄u coāhca. Yahuina p̄htorore ti cjā puha wajāri maca jira tí maca. Tí maca macaina ñaina jia Sodoma macaina, Egipto macaina yoaro seheta jia, tí p̄jare Sodoma, Egipto c̄h̄u wama tirohca tí maca mari piti dahre buhech̄u. ⁹ ã coāa tia n̄m̄u noano coāa, pa n̄m̄u dacho macai ti p̄ac̄uri tí mahai coāhca. ã jia jipihtia yahpari macaina, jipihtia curuari macaina, jipihtia d̄seri durucuina tópe n̄m̄uri waro ti p̄ac̄urire ñ̄rucuahca. ã ñ̄rucua tópe n̄m̄uri waro ti p̄ac̄urire ya dutisi. ¹⁰ Ti ã yariarina jich̄u ñ̄u ahri yahpa macaina wahcheahca. ã wahchea

bose n̄m̄ure yoaa, ti basi paye barore ã wanocaahca. Tina p̄aro Cohamacu yare yahuina masare ñano yũhdũchũ yoarina jiri jire. ã jia ti ã yariachũ ñna wahche yũhdũahca ahri yahpa macaina. **11** ã jiro tia n̄m̄ũ baharoi pa n̄m̄ũ dacho macai Cohamacu ti p̄acũre masonohca. To ã masochũ tina pari turi wahcãrũcũ sũahca. Ti ã wahcãrũcũ sũchũ ñna jipihtina cui yũhdũahca tinare. **12** Baharo tina p̄aro m̄anopũ tuaro durucuro coa tachũ tũhoahca. Õ sehe ninohca tinare:

—Õpũ m̄ja taga m̄sa —nino coa tarohca.

To ã nichũ tũho me curua watoi m̄jaa wahaahca. Ti yabirina cjiri ti m̄jachũ ñahca. **13** Ti ã m̄jachũta yahpa tuaro ñuhminohca. To ã ñuhmichũ tí maca macaa wũhũse d̄cima parte* boraahca. ã jia yahpa ñuhmino mehne siete mil masa yariaa wahaahca. Paina dũhsaina sehe c̄aa wahaahca, Cohamacũre m̄ano macarirore “Tuariro jira”, ni ño payoahca tire.

14 Ahri jipihtia ti ã wahari baharo p̄aa taha masa ñano yũhdũ tuhsũina jiahca. Ti ã yũhdũri baharocãta pari turi d̄ihta masa ñano yũhdũahca tjoa.

Seis cornetarire ti putiri baharo paio putiha

15 Baharo seis cornetarire ti putiri baharo paio anjo to yariare putihre. To ã putichũ m̄anopũ tuaro durucua coa tahre. Õ sehe nia coa tahre:

“Mipũ Cohamacu Cristo mehne ahri yahpa macaina bui pũtoa jiahca.

ã jia jipihtina bui pũtoa ã jirucuahca”, nia coa tahre. **16** ã yoa Cohamacu panoi pũtoa dujiarũ dujiina veinticuatro Jesu yaina pũtoa Cohamacu panoi caha sũ, tire ño payohre. **17** ã ño payoa ò sehe nihre:

“Sã pũtoro Cohamacu, tua yũhdũariro jira mũhũ.

Mũhũ panopũ ã jirucua tiri jire.

Mipũ cũhũre ã jirucura mũhũ.

Mũ tuaa mehne masa ti pũtoro mũ jirucachũ

‘Noana’, nija mũhũre.

* Una d̄cima parte: Õi ‘d̄cima parte’ to nichũ, ò sehe jira. Diez wũhũse jichũ, cũ wũhũ jira d̄cima parte. Cien wũhũse jichũ diez wũhũse jira d̄cima parte.

18 Jipihtina ahri yahpa macaina m̄h̄ure cahmaeraina
m̄h̄u mehne suamare.

Mip̄ure tinare m̄ buhiri dahrehti pja jira.

Yariaina c̄h̄ure m̄ buhiri dahrehti pja jira.

Ã jiro m̄ yaina sehere noaare ti yoari wapare m̄
wahti pja jira.

Cãina tina m̄h̄ure dahra cohtaina m̄ yare yahu
m̄htaina jira.

Ã yoa tina, paina m̄ yaina mehne jipihtina m̄h̄ure
ño payoina jira.

Ã jicu p̄htoare, wiho jiina c̄h̄ure m̄ yaina ti jiri
wapa noano yoaihca m̄h̄u.

Ã jiro ahri yahpa macainare dojomehne cohtainare
m̄ cohãhti pja jira mip̄ure”,

ni ño payohre p̄htoa Cohamac̄ure.

19 Ti ã yoari baharo m̄ano macari w̄h̄u Cohamac̄u ya
w̄h̄u to pj̄ori w̄h̄u jihre. Ã jina tí w̄h̄u jiri carore ñ̄hi sã.
Tí caro puhichap̄ Cohamac̄u masare to dutiare joa òa pj̄ini
tãa pj̄ini sãahre. Sã ã ñ̄ch̄uta orocasite m̄a, w̄po pja m̄a,
soro jiro bisi m̄a, yahpa ñ̄h̄mi m̄a, co poca ȳs̄ua poca
m̄anop̄u payu bora tahre.

Numinore pinono c̄h̄ure yahuha João

12 ¹ Baharo ahri yahpa to dohse wahahtore m̄anop̄u
ñ̄ohre. To ã ñ̄ori wiho waro jierara. Õ sehe ñ̄u m̄htahi:
M̄anop̄u numinore ñ̄hi. Ticoro to suhtiro s̄u dacho macariro
yoaro sehe si sitehre. S̄u ñ̄ami macariro bui ducuhre. P̄htoro
to pisari soro barore doce ñ̄ahpichoha poca c̄j̄ari sorore
pisaricoro ducuhre. ² Ã ducuro mahanocã d̄hsahre to pohna
tihto. Ã jiro ticoro sañurucuhre. ³ Baharo pari turi ñ̄hi
m̄anop̄u: Pjiriro pinonore sohãrيره ñ̄hi. Siete dapu poca
tiroto jihre. Jipihtia to dapu poca p̄htoa ti pisaa sorori barore
pisaa dapupoca jihre. Ã jiro diez sahari tiroto jihre tiro. ⁴ To
pichõno mehne ñ̄ahpichoha pocare wahba siteroca borohre.
Jipihtia ñ̄ahpichohare dacho macabo cureroi wahba siteroca
borohre. Ã jiro numino pohna tihticoro panoi ducuhre pinono.
To mac̄nocã to bajuach̄u ch̄uro taro nimahre. ⁵ Baharocãta
c̄j̄ua tuhs̄ure wihãrirocãre. Jipihtia yahpari macaina ti p̄htoro
c̄j̄ihto jihre tirocã. To ã p̄htoro tuariro jich̄u, masa tireo
ȳhd̄r̄uca c̄no pjasi. To ã masa bajuach̄uta Cohamac̄u to

dujiro cahapɤ tirocãre naa wahcãa wahahre. ⁶ To ã yoachɤ numino sehe masa marienopɤ duhti wahcãa wahahre. Cohamacɤ to cahnoyuriropɤ duhti wahcãhre ticoro. Τόπρɤ mil doscientos sesenta dachori waro Cohamacɤ ticorore ñɤ wihborohca.

⁷ Wahmanore mɤanopɤ cahma wajã dɤcaa tiri jire. Miguel wama tiriro anjo to yaina anjoa cɤhɤ pinono mehne cahmachea tiri jire. Ti ã cahmachechɤ pinono to yaina anjoa mehne Miguere cahmachea tiri jire. ⁸ ã yoa Miguel cɤhɤ pinonore yɤhdɤrɤcaa tiri jire. ã jiro pinono yaina anjoa cɤhɤre mɤanopɤ ji namo dutiera tiri jire. ⁹ ã jiro pjiro pinonore cohãnocaa tiri jire Cohamacɤ. Tiro pinono watĩnota jiro nina. Satana wama tiriro jira. Panopɤ tiro pinono pjacɤ tiriro jia tiri jire. Tiro jipihtiro yahpa macainare mahñoriro jira. Tirore to yaina anjoa mehne mɤanopɤ jirirore yahpapɤ cohã boroa tiri jire.

¹⁰ Baharo mɤanopɤ sañurucuro coa tachɤ tɤhohi:

—Mipɤre Cohamacɤ masare yɤhdɤchɤ yoahre jɤna. Mipɤ pinihtare Cohamacɤ mari pɤhtoro jiro tahre to tuaare ñono taro. To warocariro Cristo cɤhɤ to pɤhtoro jiare to tuaare ñohre jipihtinare. Watĩnore mɤanopɤ jirirore yahpapɤ cohã borohre. ã cohã bororo to tuaare ñohre Cohamacɤ. Tiro watĩno sehe dachoripe, ñaminipe Jesu yainare “Ahrina ñaina jira”, ni yahusãno niri jire Cohamacɤre. ã jiro mari coyeare Jesu yainare yahusãriro jiri jire. ¹¹ Cristo Cordero wama tiriro to di cohãri mehne mari coyea Jesu yaina tirore wacɤ tuaina ti ñaa yoari buhire cohãre tiro. ã wacɤ tuaina jia watĩnore yɤhdɤrɤcare. ã yoa Cohamacɤ yare yahua, watĩnore yɤhdɤrɤcare. To yare ti yahuri buhiri paina tinare ti wajã duapachɤta, tina cuieraa, Cristo yare duhuerare. ¹² ã jina mɤsa mɤano macaina wahchega. Watĩnore yahpapɤ to cohã borochɤ ñɤna wahchega. Wiho mejeta ahri yahpa macaina, pjiri ma macaina cɤhɤ pjacɤoina wahanahca mɤsa sehe. Ahri yahpapɤ tirore to cohã borori baharo mɤsa cahapɤ jira watĩno. Tirore to buhiri dahrehto mahanocã dɤhsara. ã jiro sua yɤhdɤara tiro. Mɤsa cahapɤ sɤro, pjacɤoina mɤsare tjuachɤ yoarohca tiro —ni sañurucuro coa tachɤ tɤhohi.

¹³ Pinonore yahpapɤ to cohã borochɤ ñɤno, pinono sehe numinore, wihãrirocã pocorore nɤnɤ ti wahcãhre. ¹⁴ ã jiro ticorore pjiriro cja to wɤa dɤpɤrɤre wahre Cohamacɤ, masa marienopɤ to wɤ duhti wahcãhto sehe. Τόπρɤ to sɤri baharo

tia cūhma noano pa cūhma dacho maca waroi ticorore ñu wihbohre Cohamacu. To ã ñu wihbochu pinono ticorore ñano yoa masierare. ¹⁵ Tó to jichu ñuño pinono pjíro core cho cohāhre ticorore mūroca būrochu yoaro taro. ¹⁶ To ã yoachu yahpa sehe ticorore yoadohohre. Pinono to dūseroi wijaa core yahpa sehe wihmi na pahñonocahre. ¹⁷ To ã wahachu ñuño pinono sua yūhdūahre. Æ suaro cāina ticoro panamana ji turiaina mehne cahmacheno wahahre pinono. Tina sehe Cohamacu dutiare yoaina jia, Jesu ya buheare noaa buheare ne duhueraina jihre. ¹⁸ Æ yoa pinono pjiri ma dūhtu cahai ducuhre.

Puaro nucu macainare yahuha João

13 ¹ Æ yoa nucu macarimore tí mai jirimore to wahcã wihichu ñuhi. Tiro sehe siete dapu poca, diez sahari tiro jihre. To sahari puhto ti pisaa sorori barore pisahre. To dapu pocare to wamare joa õri dapu poca jihre. Tí wama to ñari wama jichu ñu yabira Cohamacu. ² Tiro nucu macarimo yairo dohroriro yoaro sehe bajuhre. Æ jiro oso yoaro sehe dahpori tiro jihre. Yairo sohāriro pjiriro wuru yoaro sehe dūsero tiro jihre. Æ yoa pinono sehe to tuaare wahre nucu macarimore. Æ waro tirore to puhtoro dujiroi cūno, tiro yoaro sehe payu masare dutichu yoahre pinono nucu macarimore. ³ Cū dapu nucu macarimo dapu ti wajāmariro dapu yoaro sehe bajuhre. To ã bajupachuta to camino sehe yatia wahahre. Tí dapu to catichu ñua, cūaa wahahre jipihtina ahri yahpa macaina. Æ cūaa, nucu macarimore ño payohre. Æ jia tiro mehne macaina wahahre masa. ⁴ Æ yoa nucu macarimore pinono to tuaare to wachu ñua masa sehe tirore pinonore na tuhcuca caha su, ño payohre. Æ jia nucu macarimo cūhure na tuhcuca caha su, tirore ño payohre. Æ ño payoa õ sehe nihre:

—Ne paio mu yoaro sehe tuariro mariahna. Pairo mūhure ne yūhdūruca masierara —ni ño payohre masa nucu macarimore.

⁵ Æ yoa tiro nucu macarimo “Tua yūhdūrucarimo jija”, to nipachuta Cohamacure to ñano durucupachuta ã tuhhotunocasinihre Cohamacu sehe. Æ jiro cuarenta y dos sūri waro tiro nucu macarimo masare dutisinimahre. Tó purota to puhtoro jiltore cūre Cohamacu. ⁶ Æ jiro tiro Cohamacure ñano durucuhre. To wamare, to wūhure, mūanoru to jiro macaina

cũhũre ñano durucuhre nũcũ macariro. 7 Ñ yoaro Cohamacũ yainare cahma wajãno tinare yũhdũrucahre. To ã yoapachũta ã ñũnocasinihre Cohamacũ. Cohamacũ to ã yoa dutierachũ yoeraboa. Ñ jiro jipihtina ahri yahpa macaina bui pũhtoro sãasinimahre nũcũ macariro. Jipihtina yahpari macaina bui, macari macaina bui, jipihtia dũseri durucuina bui pũhtoro sãasinimahre tiro. 8 Ñ jia jipihtina ahri yahpa macaina tiro nũcũ macariro panoi na tuhcuca caha sũ tirore ño payohre. Ahri yahpare Cohamacũ to bajuamehnehto pano to yaina cjihtire ã jirucuhtinare ti wamare joa õ tuhsũa tiri jire. Tí tju to ã joa õri tju Cordero ti wajãriro ya tju jira. Tí tju ti wamare joa õeraina dihta nũcũ macarirore ño payohre.

9 Cahmori tiina jira mũsa. Ñ jina tuhoga. 10 Jipihtina Cohamacũ yaina peresu wahahtina, baharo peresu wahaahca. Jipihtina tina ñosari pjĩ mehne ti ñosa wajãahtina, baharo tí pjĩ mehne yariaahca. Tíre masina mari Cohamacũ yaina ñano yũhdũpanahta tirore cohãena tjijihna. Ñ yoa tirore wacũ tuarucujihna.

11 Baharo paio nũcũ macarirore ñũhi tjoa. Yahpa puhichapũ jiriro to wijaachũ ñũhi. Pũa saharo oveja sahari yoaro sehe bajua sahari sahari tiroro jihre. Ñ yoa pinono yoaro sehe durucuhre. 12 Ñ jiro nũcũ macariro ji mũhtariro sehe baharo jiriro sehere pũhtoro sõhre. To ã pũhtoro sõriro sehe jipihtia yahpari macainare ji mũhtarirore ño payochũ yoahre. Ji mũhtariro nũcũ macariro ti wajãmariro camino yatiriro jihre. 13 Ñ yoa baharo jiriro nũcũ macariro bajuamehneare yoahre masa ti ñũ cũahto sehe. Ñ yoaro masa ti ñũrocaroi pichaca pjiri pichaca mũanopũ bora tachũ yoahre. 14 Ñ yoa ji mũhtariro to ñũrocaroi paio nũcũ macariro sehe bajuamehnea mehne masare mahñohre “Ahriri mũsa ño payohtiro jira”, nino. Tiro masare mahñono, ji mũhtariro masũre masare yoa dutihre tirore ti ño payohto sehe. Tiro ji mũhtariro ñosari pjĩ mehne ti ñosariro jiparota catiriro jihre. Tiro yoaro sehe bajuri masũreta yoa dutihre paio nũcũ macariro masare. 15 Ñ yoa baharo jiriro nũcũ macariro sehe ji mũhtariro masũre catichũ yoahre masare to dutihto sehe. Ñ jiro tí masũre ño payoerainare wajã dutihre masare masũ sehe. 16 Ñ yoaro jipihtinare ti wamomacari poto bũhũsehei ti wũhdũa poca cũhũre joa õ dutihre nũcũ macariro baharo jiriro. Wiho jiinare, pũhtoare, pache pũare, pjacũoinare, dahra cohtainare, dahra cohtaina

jierainare, jipihtinare ti wamomacarine ti wuhdua poca cūhare joa õ dutihre. **17** Tiro ji muhtariro nucu macariro to wamare, to númerore joa ñerainare ne nuchū dutierare. Tuhsū, tinare dua dutierare. **18** Tíre noano wacū masiga mūsa. Tūho masiina jina nucu macariro to númerore noano ñū masiga. Tí número mūno wama yoaro sehe jira. Tí número seis cientos sesenta y seis jira.

Cohamacū to yuhdūchū yoaina cūnota wahma basaare basaha

14 **1** Baharo Siõ wama tidū tūcū bui ducurire Corderore ñūhi. Tiro mehne ciento cuarenta y cuatro mil masa jihre. Tina to ya wamare to Pūcuro ya wama cūhare ti wuhdua pocare ti joa ñrina jihre. **2** Tinare yū ñūchūta mūanopū durucuro coa tahre. Pjiri poaye to bisiro seheta wūpo pjíro to bisiro seheta bisiro coa tahre to durucua. Ñ yoa arpa wama tiare ti būapūtēno seheta bisiro coa tahre to durucua. **3** Tóí pūhtoro to dujiro cahai pititiaro soro bajuina, Jesu yaina pūhtoa cūhū paina jihre. Ñ jia tina panoi ciento cuarenta y cuatro mil masa ducuhre. Tóí ducua cūnota wahma basaare basaa nihre. Tí basaare tina dihta masihre. Ahri yahpai jiina ciento cuarenta y cuatro mil Cristo to yuhdūchū yoaina dihta tí basaare masihre. **4** Ne tina cū tahacā numino mehne ñano yoerare. Ñ yoa Corderore ñū cūina jia, to yare ñ yoarucuina jihre. Ñ jiro tinare ñaina mehne jiinare to yuhdūchū yoahinare naahre Cohamacū sehe. Ñ to yuhdūchū yoarina jia, Cohamacū yaina cjihti, Cordero yaina cjihti cūhū ji muhtaina jihre. **5** Tina mehne macaina ne cūiro mahñoriro mariahna. Ñ jia Cohamacū to tūhotuchū ñaa buhiri marieina jihre tina.

Tiario anjoa yahuroca boroha

6 Baharo mūanopū wūrirore anjore ñūhi. Tiro ahri yahpa macainare jipihtia curuari macainare, jipihtia dūseri durucuinare, jipihtia yahpari macainare noa buheare yahuhtiro jihre. Tí buhea ne cohtotaeraa, ñ jirucura. **7** Ñ jiro anjo sañurucuro õ sehe niroca borohre:

—Cohamacūre cui, ño payoga. “Tua yuhdūariro, noa yuhdūariro jira”, niga tirore. Mipūre tiro masare to buhiri dahrehti pja jiro nina. Tiro mūanore, yahpare, pjiri mare, mári pohtari cūhare yoariro jira. Ñ jina tirore na tuhcuca caha sū, wahche payoga —ni sañurucuhre anjo.

8 To ã niri baharo paio anjo mũanopũ wũriro õ sehe niroca borohre:

—Tinare cohãnocahre. Pjiri maca Babilonia wama tiri maca macainare cohãnocahre Cohamacũ. Tina to cohãrina sehe jipihtina painare ñano yoachũ yoare. Masa tinare ñũ cũa ñaare goa pjaa, tíre yoare. Cahaina vinore ti tuaro goa pjaro seheta tina ñaare tuaro goa pjare Babilonia macainare ñũ cũa —ni yahuroca borohre paio anjo.

9-10 Tina pũaro anjoa ti ã niri baharo paio anjo ti baharo wũriro õ sehe tuaro niroca borohre:

—Jipihtina nũcũ macarimore ño payoinare, to masũre ño payoinare, ti wũhdũa pocare, ti wamomacarine to wamare joa õrina cũhũre buhiri dahrerohca Cohamacũ. Tina mehne suaro, tina pinine tuaro waro buhiri dahrerucurohca Cohamacũ. Nũcũ macarimore ño payoina jipihtina pichacapũ wahaahca. Tópũ tuaro purĩnohca tinare pichaca mehne, azufre wama tia mehne ti wijãri pichaca mehne. Noaina anjoa, Cordero cũhũ ti ñũrocaroi ñano yũhdũahca tina. ¹¹ Tí pichaca ã me tirucurohca. Ne yatisi. Tinare ã purĩrucuchũ yoara. Jipihtina nũcũ macarimore na tuhcuca caha sũ ño payoinare ã purĩrucurohca. Dachoripe, ñaminipe ã purĩrucunocanohca. To masũre ño payoina, to wamare ti joarina cũhũ tó seheta ñano yũhdũahca —niroca borohre anjo.

12 Ti ã ñano yũhdũchũ ñũna Cohamacũ yaina to dutiare yoaina, Jesure cohãeraina jina, to yare duhuena tjiga. Ñano yũhdũpanahta Cohamacũ yare cohãena tjiga.

13 Baharo mũanopũ yũhũre durucuro coa tachũ tũhohi. Õ sehe nihre yũhũre:

—Ahrire joaga mũhũ. Cohamacũ yaina tirore cohãeraina jina mipũre mũsa yariari baharopũ cũhũre wahcheina jira mũsa —niroca borohre yũhũre.

To ã niri baharo Espĩritu Santo sehe õ sehe ni namohre tjoa:

—Ã tjira. Potocã tjira. Tina tuaro ti dahraare duhu, soahca. Mũanopũ ti wahachũ noano ti yoirire wacũnohca Cohamacũ. ã yoa ti ã yoiari wapa tinare noano yoarohca. ã jia tina wahcheina jira —ni namohre Espĩritu Santo.

Wese macaa toaa dichare mari bese nano seheta Cohamacu to yainare bese nanohca. Ñaina sehere soro bese daporohca

14 Baharo me curua yehseri curuare ñahi. Tí curua bui masano yoaro sehe bajuriro dujihre. Tiro uru soro pãtoro to pisari soro barore pisahre. Ñ yoa yoari pjĩ siori pjĩne cjuahre tiro. 15 Baharo paio anjo Cohamacu wũhũi jiroro wijaa tahre. Ñ wijaa taro tuaro sañurucuhre me curua bui dujirirore:

—Mũ yoari pjĩ mehne wese macaa dichare ahri yahpa macaa dichare dũte naa pahñoga. Mipũre to quihõri pja sũra. Mipũ dicha sehe sohã tuhsũhre —nihre anjo.

16 To ã nichũ tũhoro to yoari pjĩ mehne ahri yahpa macaa dichare naa dũcahre me curua bui dujiriro.

17 Baharo paio anjo cũhũ mũano macari wũhũi Cohamacu wũhũi jiroro wijaa tahre. Tiro cũhũ yoari pjĩ siori pjĩne cjuahre.

18 Ñ yoa paio anjo altar cahapũ jiroro wijaa tahre. Tiro sehe altar macari pichacare ñũ wihboriro jihre. Ñ wijaa taro yoari pjĩ siori pjĩne cjuarirore õ sehe ni sañurucuhre:

—Mũ yoari pjĩ mehne ahri yahpai jiri wese, se wese macaa dichare naaga. Se sehe ñi tuhsũhre —ni sañurucuhre.

19 To ã nichũ tũhoro anjo to yoari pjĩ mehne ahri yahpa macaa se tõhorine yihso nahre. To ã yoari baharo tí tõhorine se tõhorine to tũ tihãhtoi cohãhre. To ã cohãriro seheta Cohamacu tirore cahmaerainare tuaro suaro, cohãnohca. 20 Tí maca dũhtũ cahai ti tũ tihãhtoi tí se tõhorine tũ tihãhre. Tói ti tũ tihãchũ di wijaaahre. Di ma yoaro sehe jihre tí di. Tres cientos kilómetros yoari ma, cã metro noano pa metro dacho macai cũãri ma jihre.

Masa ti ñano yũhdũhtore anjoa cũ batoaha masare

15 1 Baharo mũanopũ soro jirore ñahi. Tíre ñũa masa cũaa wahaca. Ahri yahpapũre to dohse wahahtore marine ñohre. Ñ jiro tí wiho waro jia nierara. Ñ sehe ñahi: Siete anjoa jihre. Cohamacu suaro, siete tahari masare buhiri dahre batoaro taro nihre. Ñ jia tina siete anjoa sehe buhiri dahre dutiro to cũhtina jihre.

2 Anjoare yũ ñũri baharo pjiri mare noano co sitiri ma yoaro sehe jiri mare ñahi. Tí ma pichaca mehne jiri ma jihre. Ñ yoa nũcũ macarirore to masũ cũhũre yũhdũrũcainare ñahi.

Tina to wamare to númerore cjuæeraina jihre. Tina yu ñuchu pjiri ma co sitiri ma duhtu cahai ducuhre. Tóí ducuina arpa wama tiare buaputêare cjuahre. Tí buaputêa Cohamacu to wari jihre. ³ ã jia Cohamacure dahra cohtariro Moise cjiro ya basaare cñota basaa nihre tina. Cordero ya basaa cñhare basaa nihre. Õ sehe ni basahre:

“Sã puhtoro muhu Cohamacu tua yuhduariro jira.

Mu yoarire ñuna ñu cña wahaja sã.

Mu yoari noa yuhduara.

Muhu jiphtia yahpari macaina bui puhtoro jira.

Noano mahñoño marieno, quihñoño yoarucura muhu.

⁴ Jiphtina muhure wahche payoahca.

Jiphtina muhure ‘Tuariro jira’, niahca.

Muhu dihta ñaa marieriro jira.

Jiphtia yahpari macaina mu caharu sã, na tuhcuca
caha su, muhure wahche payoahca.

Áta yoahca tina jiphtina noano mu yoarire ñu”,

ni basaa nihre tina.

⁵ Baharo muanoru ñuroca mucu, Cohamacu wuhure pjõori wuhure ñuhi. Tóí Cohamacu to ya tahtia waroi to dutia to joaa pjini tã pjini ti wihbori pjini jihre. ⁶ Tí wuhure yu ñuchuta siete anjoa tí wuhu puhicharu jirina wijaa tahre. Tina Cohamacu to buhiri dahre dutiro to cñhtina jihre. Tinape ti buhiri dahrehtire cjuahre tina siete anjoa. Noaa suhti, wete maria suhti, si sitea suhti tiina jihre. ã jia ti cutiro bui uru cahsaro mehne tuã dihorina jihre. ⁷ Tí wuhuru jirina ti wijaa tachu pititiaro soro bajuina mehne macariro tinare siete anjoare siete uru wahwarire wahre. Tí wahwari Cohamacu suaa to buhiri dahrehtie mehne noano wahpaah wahwari jihre tí wahwari. Tiro Cohamacu ã jirucuriro jira. ⁸ To ã wachu Cohamacu wuhu puhicharu to si sitea mehne to tuua mehne me ti sahsea wahahre. To ã me wuhu wahachu ne masa tí wuhure sã masierare. Siete anjoare Cohamacu buhiri dahre dutiro to cñriro sehta masare ti buhiri dahre batoari baharo pari turi tí wuhuru sã masina tjoa. To buhiri dahrehto pano sã masierare.

Cohamacu masare to buhiri dahrehtore yahuha

16 ¹ Baharo Cohamacu wəhəi tuaro durucuro coa tahre. Siete anjoare yahuro nihre:

—Siete wahwarihi posa tiare yahpapu pio siteroca borona wahaga. Yahpa macainare Cohamacu to niriro seheta buhiri dahresiniga mipəre —ni durucuro coa tahre.

² To ã nino coa tachu təhoro ji mətariro anjo to cjuari wahwai posa tiare yahpapu pio siteroca borohre. To ã pio sitechu nəcū macariro wamare joa ōrina, to masure ño payoina ñano cami tihre. Tí cami tuaro purihre tinare.

³ To ã pio siteri baharo paio anjo tjoa to cjuari wahwai posa tiare pio siteroca borohre tjoa pjiri mapu. To ã pio sitechuta tí ma di ma wahahre. Yariariro di yoaro sehe jihre tí di. Ñ wahachu tí ma puhichapu jiina yaria pihtia wahahre.

⁴ Pəaro ti ã pio siteri baharo paio anjo tjoa to cjuari wahwai posa tiare pio siteroca borohre tjoa máripu, tí mári pohtaripu cūhure. To ã pio sitechu mári di mári dihta wahahre. ⁵ To ã wahachu ñəno paio anjo márire cohtariro ō sehe nihre:

—Cohamacu məhu ñaa marieriro jira. Mipə cūhure ã jirucuro jira məhu. Panopu cūhure ã jiruca tíre məhu. Ñ jicu masa ti ñano yoachū ñəcū quihōno tinare buhiri dahrehre məhu. Di márine yoacu noano yoahre məhu. ⁶ Nəcū macariro yaina sehe mū yainare wajāa, di cohāchu yoahre. Mū yare yahuina cūhure wajāa, di cohāchu yoahre. Ti ã wajāri buhiri mári di mári wahahre. Ñ yoa tinare dire mū ã sihnichū yoachū noa nina. Ō seheta mū yoachū cahmahre tina —nihre márine cohtariro anjo.

⁷ To ã niri baharo altarpə durucuro coa tahre:

—Ñ tjira. Cohamacu sã pəhtoro tua yəhdəariro jira məhu. Mahñono marieno, quihōno masare bese, buhiri dahrera məhu —ni durucuro coa tahre.

⁸ Tiaro anjoa ti pio siteri baharo paio anjo to cjuari wahwai posa tiare pio siteroca borohre tjoa sū dacho macariro bui.

To ã pio sitechuta sūre masare tuaro sichū yoahre Cohamacu.

⁹ Ñ jiro sū dacho macariro masare tuaro sihre. Ñ jia Cohamacu tinare to buhiri dahre dutichū masia, tirore ñano durucuhre masa. Ñ ñano yəhdəpahta Cohamacure maca duaerare. Cohamacure “Tuariro jira”, ni wahche payo duaerare.

10 Pititiaro anjoa ti pio siteri baharo pairo anjo tjoa to cjuari wahwai posa tiare pio siteroca borohre tjoa nuc̄ macariro to dujiro bui. Pũhtoro dujiro jihre to dujiro. To ã pio siteri baharo nuc̄ macariro to yaina ti jiri yahpap̄ nahitiano wahahre. Ñ jia to yaina masa ñano purĩch̄ bahca dihohre. 11 Tinare ñano purĩpach̄ta, ñano camĩ tipahta, ne ti ñaa yoarire cahyaerare. Ñ yoa tíre duhuerare. Ñ jia Cohamac̄ tinare to camĩ dahrech̄ masia tirore m̄ano macarirore ñano durucuhre.

12 Cũ wamomaca pihtiina anjoa ti pio siteri baharo pairo anjo tjoa to cjuari wahwai posa tiare pio siteroca borohre tjoa Eufrates wama tiri ma pjiri map̄. To ã pio sitech̄ta tí ma sihbi cahaa wahahre. Sũ m̄ja taro macaina pũhtoa ti yaina masa mehne tí máre ti pahã tahto sehe ã yoahre.

13 Baharo tiaro watĩare taharo buc̄na yoaro sehe bajuinare ñũhi. Cũiro pinono puhichap̄ jiriro to d̄serop̄ wijaa tahre. Pairo watĩno nuc̄ macariro d̄serop̄ wijaa tahre. Pairo watĩno “Cohamac̄ yare yahuriro jija”, ni mahñoriro d̄serop̄ wijaa tahre. 14 Tina tiaro watĩa bajuamehneare yoaina jihre.

Jipihtiro macaina pũhtoare cahmachuch̄ yoahre tina cahma wajã dutia taa. Ti ã cahma wajãhti dacho Cohamac̄ tua yũd̄uiri jipihtinare to dutihti dacho, pihtihti dacho jira. 15 Ñ sehe nihre Jesu: “Ñũga m̄sa. Yacariro wac̄enoca to yacaro taro seheta yũh̄ cũh̄ wac̄enoca taihtja. Yũ tahtore noano cohtariro wahcheriro jirohca. To yare noano cahnoriro, to suhti sãariro jira wahcheriro. Ñ yoiriro jiro yũ tach̄ b̄o tisi tiro suhti marieriro yoaro sehe jieraro”, nihre Jesu.

16 Baharo tiaro watĩa yahpari macaina bui pũhtoare cahmachuch̄ yoahre tinare. Ti cahmachuno Hebreo ya d̄sero mehne “Armagedon” wama tihre.

17 Seis anjoa ti pio siteri baharo pairo anjo tjoa to cjuari wahwai posa tiare me curuari cahap̄ pio siteroca borohre tjoa. To ã pio siteri baharo pũhtoro dujirop̄ Cohamac̄ wũh̄ jiri dujirop̄ tuaro durucuro coa tahre:

—Tó puro tjica —nino coa tahre.

18 To ã nich̄ta orocasite m̄a, w̄po pja m̄a, soro jiro bisi m̄a, cuaro yahpa ñuhmihre. Ahri yahpai masa ti ji d̄cari baharo ne tó sehe ñaca yahpa ñuhmiera tihre. Paye ñuhmia yũd̄oro cuaro yahpa ñuhmihre. 19 Ñ to ñuhmich̄ pjiri macare tia maha yihti m̄aa wahahre. Ñ jia b̄j̄a macari ahri yahpai jia macari boraah wahahre. Ñ jiro Babilonia wama tiri maca pjiri

maca macainare wacũhre Cohamacũ tinare buhiri dahrero taro. Ti ñaare yoari buhiri tina mehne tuaro suahre. Å suaro tinare tuaro buhiri dahrehre. **20** To ã yoachũ jipihtia nũcopo, tũyucũ cũhũ cohõ pihtia wahahre. Å jia ne mariahare. **21** Å yoa bũjũa poca co poca yũsũa poca yahparũ masa bui bora tahre. Jipihtia poca co poca cuarenta kilos nũcũa poca jihre. Tina bui ti ã bora tachũ Cohamacũ masare to tuaro buhiri dahrechũ masia ñano durucuhre masa Cohamacũre.

**Mũa mehne ñano yoarucuricorore ñabiaro
yoaricorore buhiri dahre dutirohca**

17 ¹ Baharo siete wahwarire cũaina anjoa mehne macariro yũ caharũ wihiro õ sehe nihre yũhũre: —Ñũi taga. Payũ mări bui dujiricorore mũa mehne ñano yoarucuricorore ñabiaro yoaricorore Cohamacũ to buhiri dahrehtore ñũihca mũhũ. ² Ahri yahpa macaina pũhtoa ticoro mehne ti ñano yoaboro seheta ticoro yoaro seheta yoare tina. Cohamacũ ya sehere cahmaerare. Ahri yahpa macainare to cahachũ yoaboro seheta tina mehne to ñano yoaboro seheta ticoro masare ñaare goa pjachũ yoare. Å yoaro ñaare yoachũ yoare masare —ni yahuhre anjo yũhũre.

³ To ã niri baharo Espiritu Santo sehe to bajuamehneare yũhũre ñohre. Anjo sehe masa marienopũ naahre yũhũre. Tõi numinore ñũhi. Ticoro nũcũ macariro sohãriro bui pisaricoro jihre. Nũcũ macariro sehe to pjacũi payũ wama ti joa õriro jihre. Tí wama ñaa wama Cohamacũ to ñũ yabia wama jihre. Å yoa siete dapu poca tiro, diez sahari tiro jihre nũcũ macariro. ⁴ Tuhsũ, numino sehe noano yahsaa suhti pũhtoa ti sãa suhti sehe jiare sãaricoro jihre. Sohãa suhti cũhũre sãaricoro jihre. Payũ urure, wapa tia tãare, perla yapari cũhũre õa suhtire sãaricoro jihre ticoro. Uru wahware cũahre ticoro. Tí wahwai posa tia ñaa to yoari jihre. Mũa mehne ñano yoaro pjíro ñano yoahre ticoro. Tí ñaare ñũ yabira Cohamacũ. ⁵ To wũhdũai to wama ti joa õricoro jihre. Tí wamare noano masieraja mari. Tí wama piti dahre buheri wama jira. Ahri jira tí wama: “Pjiri maca Babilonia wama tiri maca jira. Jipihtia ñaa yoare goa pjaare yoa dũcaricoro, Cohamacũre cahmaerachũ yoaricoro jira” ni, to wũhdũai ti joa õricoro jihre. ⁶ Å jicũ ticoro payũ Cohamacũ yainare wajãricoro to jichũ masihi. Cahaare to wahchero seheta tinare wajãno ti di

cohāchɯ wahchehre ticoro. Jesu yare ti yahuri buhiri ticoro wajāhre tinare. Ticorore ñɯcɯ, ñɯ cɯaa wahahi.

7 —¿Dohseacɯ mɯhɯ ñɯ cɯaa waharide? —nihre anjo yuhɯre—. Mɯ masierarire mɯhɯre yahuihtja. Numinore mɯhɯre yahuihtja. To pisariro cɯhɯre yahuihtja. Tiro nɯcɯ macariro, siete dapu poca tiro, diez sahari tiro jihre. 8 Tiro panopɯ jiro jire. Mipɯre mariahna tiro. Baharo tiro cɯāri copapɯ jiro wijaa tarohca. To ã wijaa tari baharo pichacapɯ waharohca. Ahri yahpa macaina tirore ñɯ cɯa, ño payore tirore. Ahri yahpa to jihto pano Cohamacɯ to yaina cjihtire ã jirucuhtinare ti wamare joa òa tiri jire. To joa òeraina jire nɯcɯ macarirore ño payoina. Tiro sehe panopɯ jia tiri jire. Mipɯ sehere mariahna. Baharo pari turi bajuarohca tjoa. Æ jia to bajuachɯ ñɯa masa tirore ñɯ cɯaa wahaahca.

9 'Mipɯre yɯ yahuhtire masi duana, noano tɯhonahca mɯsa. Æ yoana noano masiina jiga. Nɯcɯ macariro dapu poca siete dapu poca siete tɯyucɯ jira, mari piti dahre buhechɯ. Tí tɯyucɯ bui pisara ticoro mɯa mehne ñano yoarucuricoro. Tí dapu poca siete pɯhtoa yoaro sehe jira, mari piti dahre buhechɯ. Payɯ masa bui pɯhtoa jira. 10 Cinco pɯhtoare cohā tuhsɯre. Pairo tina baharo jiro pɯhtoro jira mipɯre. Pairo sehe baharo pɯhtoro sāanohca. Æ sāano mahanocā pɯhtoro jirohca tiro. 11 Æ jiro nɯcɯ macariro panopɯ ji mɯhtariro, mipɯ marieriro tina siete pɯhtoa baharo pɯhtoro jirohca. Siete pɯhtoa mehne macariro jira. Baharo pichacapɯ waharohca.

12 'Nɯcɯ macariro sahari diez sahari diez pɯhtoa yoaro sehe jira mari piti dahre buhechɯ. Payɯ masa bui pɯhtoa jira. Tina pɯhtoa sāerasinihre. Baharopɯ pɯhtoa sāa mahanocā pɯhtoa jahca. Yoari pja ji dutisi tinare. Æ pɯhtoa jia nɯcɯ macariro mehne pɯhtoa jahca. 13 Tina diez pɯhtoa cɯno potori tɯhotuina jira. Tina nɯcɯ macarirore ti ya yahpari macaina bui pɯhtoro sōahca. 14 Æ jia Cordero mehne cahma wajāahca. Tí ã cahma wajāpachɯta Cordero to beseina mehne tirore ne cohāeraina mehne tinare yuhdɯrɯcaahca. Tiro jipihtina paina pɯhtoa bui pɯhtoro jira. Æ jiro tinare yuhdɯrɯcarohca —ni yahuhre yuhɯre anjo.

15 Ahrire yuhɯre yahu namohre anjo:

—Mɯa mehne ñano yoarucuricoro mári bui dujire. Tí mári ahri yoaro sehe jira mari piti dahre buhechɯ: Yahpari macaina, payɯ curuari macaina, payɯ dɯserire durucuina yoaro sehe

jira tí mári. **16** Nũcũ macariro, diez pũhtoa mehne mũa mehne ñano yoarucuricorore ñũ yabiahca. Tina diez pũhtoa nũcũ macariro mehne ticoro yare ma pahño, suhti marienicoro cohãahca ticorore. ã yoaa to pjacũre chũahca. Ti ã yoari baharo ticorore jũ pahñoahca. **17** Tina diez pũhtoa cãno potori tũhotua nũcũ macarirore ti ya yahpari macaina bui pũhtoro sõahca. Tinare ã yoachũ yoare Cohamacũ, to cahmano seheta yoaro taro. ã jiro nũcũ macariro sehe pũhtoro jirohca. Jipihtia Cohamacũ panopũ to yahuriro seheta to yoari baharo nũcũ macarirore cohãnohca. **18** Ticoro mũ ñũricoro mehne õ sehe ni piti dahre buhera: Ticoro pjiri maca Babilonia wama tiri maca yoaro sehe jira. Jipihtina paina pũhtoa bui jira tí maca macaina —nihre anjo yũhũre.

Babilonia wama tiri maca to cohãri maca jira

18 **1** Baharo paio anjo mũanopũ dujiarirore ñũhi. Tiro pũhtoro waro jihre. To si sitea jipihtiropũ noano buhria sahsea wahahre. **2** To ã dujiari baharo õ sehe ni tuaro sañurucu yahuhre:

—Cohãri jihre. Babilonia wama tiri maca pjiri maca macainare cohãri jihre. Mipũre watĩa, payũ ñaina pjacũ bajueraina cũhũ tí macai jia nina. Ñaina baro wahiquina wũina peri cũhũ masa ti ñũ yabiina tí macai jia nina.

3 Jipihtia yahpari macaina tí maca macainare ñainare ñũ cũa, tina cũhũ ñano yoare. ã yoa yahpari macaina bui pũhtoa tí maca macaina numia mehne ñano yoare. Ticoro ã mũa mehne ñano yoarucuricoro jiro wapa tiare nuchũa tire. Pjĩro to ã nuchũchũ ahri yahpa macaina pache duaina pjĩro wapatare —ni yahuhre anjo.

4 Baharo pari turi mũanopũ durucuro coa tahre. Õ sehe nihre:

—Yũ yaina ahricoro mũa mehne ñano yoarucuricoro mehne jienu tjiga mũsa. Ticoro mehne mũsa jichũ mũsa cũhũre buhiri dahrerohca. ã jina to ñano yoaa ñũ cũena tjiga. **5** To ñano yoari payũ jinocahna. To ñano yoirire pari tju mari duhu payo mũochũ tí tju sehe mũanopũ wahã sũnocaboa. ã jia to ñano yoari payũ jinocahna. ã jiro to ñano yoirire wacũna Cohamacũ. ã wacũno ticorore buhiri dahre dutirohca.

6 Ticoro tuaro to buhiri dahrehticoro jijaro. Masare to ñano yoachũ yoiriro seheta ticoro cũhũre ñano yũhdũchũ yoajaro.

Masare ã ñano to yoariro seheta tí yũdoro ticorore ñano buhiri dahrejaro. ⁷ Ticoro “Noaricoro jija”, ni tũhotumare. ã ni tũhoturo, wapa bũjũare pjíro cjuare ticoro. To wapa bũjũare pjíro to cjuaro purota ticorore pjíro ñano yũhdũchũ yoajaro. Tó purota ticorore cahyachũ yoajaro. To basi õ sehe ni tũhotumana ticoro: “Õi pũhtorocoro yoaro sehe jiricoro dujija. Wapewahyoro jieraja. ã jico ne ñano yũhdũsi yũhũ”, ni tũhotumana ticoro. ⁸ ã ni tũhoturicoro to jichũ wacũenoca ticorore buhiri dahrehto jirohca. Ticoro dohati, yariainare yahco tii, jũca barohca. Tuhsũ, ticorore jũ borohca. Mũsa pũhtoro Cohamacũ ticorore buhiri dahre dutiriro tua yũhdũariro jira. ã jiro tó seheta yũ niriro seheta ticorore buhiri dahre dutirohca —nino coa tahre mũanopũ.

⁹ ã jia ticoro yoaro sehe jiri macare Babiloniare Cohamacũ to buhiri dahreri baharo ahri yahpa macaina pũhtoa tuaro cahya, tiiahca. Tí maca macaina mehne ñano yoaina jire. ã jia tí maca to jũchũ ñũa tiiahca tina. ¹⁰ To ã jũchũ ñũa tina pũhtoa yoaropũ ñũrocarucuahca, “Mari cũhũre buhiri dahreri”, nia. Tóí ñũrocarucua õ sehe niahca:

—Cue, pjacũori maca jira, Babilonia. Sí maca pjiri maca tuari maca jimahre. Wacũenoca sí macare buhiri dahrehre —niahca tina.

¹¹ Jipihtiropũ macaina pache duaina tí macare ñũa tuaro cahya tiiahca. Tí maca to pihtichũ ñũa, ti pachere nuchũina mariachũ ñũa cahyaahca tina. ã jia tiiahca. ¹² Ti na tarire urure, platare, wapa bũjũa tãare, perla wama tia poca cũhũre nuchũina mariahca. ã yoa paye ti na tari cjirire suhti noaa suhtire, yahsaa suhti pũhtoa ti sãa suhti yoaro sehe jia suhtire, seda wama tia suhtire, sohãa suhtire nuchũina mariahca. ã yoa paye ti na tarire yucũri me sitia yucũrire nuchũina mariahca. ã yoa paye ti na tarire marfil wama tiro mehne ti yoarire, wapa bũjũa yucũri mehne ti yoarire, bronce wama tiri comaa mehne ti yoarire, comaa mehne ti yoarire, marmol wama tiro mehne ti yoarire nuchũina ne mariahca. ¹³ ã yoa paye ti na tarire canela wama tiare ti chũare coachũ yoare, paye ti chũare coachũ yoare, inciensore, mirra wama tia me sitiare, paye me sitiare nuchũina mariahca. ã yoa paye ti na tarire vinore, chũa wajaa sere, trigo pohcare noano ti sũhaweri pohcare, trigo yaparire, wachũare, corderoare, cawaloare, tunua bũso cawaloa ti wajaa bũsore nuchũina mariahca.

Dahra cohtainare nuchũ tinare cjuaina cũhũ mariahca. Masa ti jipachuta tinare nuchũina jimahre. Mipũre mariahca. ã jia cahyaahca pache duaina. 14 ã jia õ sehe niahca tina tí maca macaina cjirire:

—Ade, ñacaro wahajari. Jipihtia mũsa cahĩri cjiri pihtia wahahre. ã yoa jipihtia noaa mũsa cjuari cjiri pihtia wahahre. ã ti pihtia wahachũ tĩre pari turi bocasi mũsa —niahca pache duaina.

15 Tina tí macare pachere duaa, pjĩro wapatamare. ã jia tina tí macare yoaropũ ñũrocarucuahca, “Mari cũhũre buhiri dahreri”, nia. ã ñũrocarucua tí macare tuaro cahya, tiiahca. 16 Õ sehe niahca tí macare:

—Cue, pjacũoina jira sí maca pjiri maca noari maca macaina cjiri. Sí maca numino yoaro seheta noaare cjuahre. Numino sehe noaa suhtire, yahsaa suhti pũhtoa ti sãa suhti yoaro sehe jia suhtire, sohãa suhti cũhũre sãahre. ã yoa uru, wapa bũjua tãa, perla wama tia poca õa suhtire sãahre. Tó seheta yoahre sí maca macaina. 17 ã jia wacũenoca sí maca buti pihtia wahahre —niahca tí macare.

ã yoa jipihtina dohoa bũso mehne tiniina, tí bũso pũa, ti mũa, paina pjiri mapũ dahra wapataina cũhũ tí macare yoaropũ ñũrocarucuahca. 18 Tóĩ ñũrocarucua tí macare to jũchũ ñũa õ sehe ni saũurucuahca:

—Noaa macari sí maca yoaro sehe jia macari ne paye macari mariahna —ni saũurucuahca tina.

19 ã cahyaina jia ti dapu poca bui dihtare orẽ payoahca. ã jia tuaro yahco tiia õ sehe niahca:

—Cue, pjacũoina jira sí maca macaina cjiri. Noari maca jimare. Jipihtina dohoa bũso cjuaina pjiri mapũ tiniina sí maca macaa pache mehne noano wapata mahi mari. ã yoa dóihta sí maca macaa buti pihtia wahahre —niahca bũso macaina.

20 Tí macare to cohãchũ ñũna wahchega mũsa mũano macaina. Cohamacũ yaina, Jesu to cũrina, to yare yahu mũhtaina jipihtina mũsa wahchega. Tí maca macaina mũsare ñano yũhdũchũ yoare. Ti ã yoari buhiri buhiri dahrehre Cohamacũ. ã jina wahchega mũsa.

21 ã yoa tuariro anjo pjiria tãcare arẽni soro puro jiria tãcare na wahcõ, pjiri mapũ doca ñohre. ã doca ñono õ sehe nihre:

—Ahria tãca to bora ñojariro seheta pjiri maca Babilonia wama tiri maca tuaro boraro bisirohca. To ã borari baharo tí macare pari turi ñusi masa. ²² Tí macare butia wahachũ yoarohca. ã jia tí macai basaare m̄sa basarucuriro sehe ne coa tasi. Arpa wama tiare m̄sa b̄ap̄ut̄erucuriro sehe, flauta wama tia pocare, corneta c̄h̄ure m̄sa putirucuriro sehe pari turi tí macai coa tasi. ã yoa tí maca mariachũ pari turi tí macai dahraina dahrasi. ã yoa tãca mehne m̄sa soari c̄h̄ure t̄homahnosi. ²³ Ne tí maca to buhria coãriro sehe ne jisi. ã yoa wamomaca d̄hteina m̄sa bose n̄m̄ure m̄sa dahreriro sehe pari turi ne coa tasi. Tí maca macaina pache duaina nuch̄ina mehne paina ȳhdoro c̄jahre m̄sa. ã jina yaya wijõ wijĩina yoaro sehe yoana jipih̄tiro macainare mah̄ohre m̄sa. M̄sa ã yoarire ñũ c̄aa, Cohamacũ sehere cahmaerare masa —nihre tuariro anjo.

²⁴ Tí maca macaina Cohamacũ yare yahu m̄htainare paina to yaina c̄h̄ure jipih̄tiro macainare wajãri jire.

19 ¹ Babilonia to dohse wahahtore yũ ñuri baharo m̄anop̄ payũ masa sañurucua coa tahre yũ t̄hochũ. Õ sehe ni sañurucuhre:

“Aleluya.

Cohamac̄ure noano durucujihna.

Cohamacũ marine ȳhdũchũ yoariro jira.

Tirote noano ño payojihna.

Tua ȳhd̄ariro jira tiro.

² Mah̄ono marieno quih̄ono masare buhiri dahrera tiro.

Ñaricorore m̄a mehne ñano yoarucuricorore ñũ c̄ua jipih̄tiro macaina, ahri yahpa macaina ñano yoahre.

Ticoro sehere buhiri dahrehre Cohamacũ.

ã jiro tirote dahra cohtainare ticoro to wajãri buhiri buhiri dahrehre tiro”,

ni sañurucua coa tahre.

³ Pari turi sañurucua coa tahre:

“Aleluya. Cohamac̄ure noano durucujihna. Tí maca ñari maca to jãri maca ã me tirucurohca”,

ni sañurucua coa tahre.

⁴ ã yoa veinticuatro Jesu yaina p̄h̄toa, pititiro soro bajuina mehne na tuhca caha sũ, Cohamac̄ure to dujiro

dujirirore wahche payohre. Õ sehe ni wahche payohre tina:
 “Amén. Aleluya. Æ tjira. Cohamacüre noano durucujihna”,
 nihre tina.

⁵ Baharo pũhtoro dujiropũ ò sehe nino coa tahre:

“Mari pũhtoro Cohamacüre wahche payoga.

Tirote dahra cohtaina, tirote ño payoina, wiho jiina,
 pũhtoa cũhũ jipihtina mũa tirote noano
 durucuga”,

nino coa tahre.

**Cordero to wamomaca dũhtehti nãmũ
 bose nãmũre yahuha João**

⁶ Baharo payũ masa ti durucuchũ tũhohi. Pjiri poaye, wũpo
 mehne to bisiro coa taro seheta durucua coa tahre yũ tũhochũ:

“Aleluya.

Cohamacüre noano durucujihna.

Tiro mari pũhtoro sehe pũhtoro sãa tuhsũre.

Tua yũhdũariro jira tiro.

⁷⁻⁸ Cordero to wamomaca dũhtehti pja jira mipũre.

To wamomaca dũhtehticoro noano ti cahno
 tuhsũricoropũ jira.

Ticorore noari suhtiro wete marieni suhtirore
 wahre.

Tí suhtiro Cohamacũ yaina noaare ti yoari yoaro
 sehe jira, mari piti dahre buhechũ.

Æ jina ti wamomaca dũhtehti pja to jichũ
 wahchejihna mari.

Cohamacüre ‘Tua yũhdũariro jira’, nijihna”,

ni durucua coa tahre.

⁹ Ti ã niri baharo anjo ò sehe nihre yũhũre:

—Ahrire joa naga: “Cordero to wamomaca dũhteri nãmũ
 bose nãmũre to pjirocarina wahcheina jira”, ni joa naga
 —nihre anjo yũhũre.

Æ ninota ò sehe ni namohre:

—Potocã tjira ahri yũ yahuri. Cohamacũ ya durucua jira
 —ni namohre yũhũre.

¹⁰ To ã nichũ tũhocũta tiro panoi na tuhcuca caha sũ, tirote
 ño payoi tai nimahi. Yũ ã yoai cahachũ waro ò sehe nihre tiro
 yũhũre:

—Tíre yoai tjiga. Mɯ yoaro seheta yũhũ cũhũ Cohamacure dahra cohtarirota jija. Mɯ coyea Jesu yaina jipihtina to ya buheare duhueraina yoaro sehe yũhũ cũhũ Cohamacure dahra cohtarirota jija. Ǻ jicũ Cohamacure na tuhcuca caha sũ, tiro sehere ño payoga —nihre anjo yũhũre.

Cohamacũ yare yahu mũhtaina cjiri panopũ macaina Espíritu Santo to yoadohoro mehne Jesu ya buheareta yahuyua tiri jire.

Cawalo yehseriro bui pisarirore yahuha João

11 Baharo mũano parĩ mũa wahachũ ñũhi. Tóí cawalo yehseriro jihre. Tiro bui pisariro õ sehe wama tihre: To niriro seheta yoariro potocã yoariro wama tihre tiro. Quihõno masare ñaina, noinare bese, tirore ñũ tuhtiina mehne cahma wajãna.

12 To capari picha pohna yoaro sehe jihre. Ǻ yoa to dapui payũ pũthoa pisaa sorori jihre. Ǻ jiro to pjacũ wama joa õriro jihre. Tí wamare tiro dihta masihre. Paina masierare. 13 To sãari suhtiro yoari suhtiro di wahãri suhtiro jihre. Tiro õ sehe wama tihre: Cohamacũ ya dũserore yahuriro wama tihre tiro.

14 Ǻ jia to yaina surara mũano macaina tiro baharo wahare. Yehseina cawaloa bui pisaina noano yehsea suhtire, wete mariea suhtire sãaina jihre. 15 To dũseroi ñosari pjĩne siori pjĩne cuhcũhre. Tí pjĩ yahpari macainare to yũhdũrũcahti pjĩ jihre. Ǻ jiro to tuaa mehne to dutichũ ne cãiro tirore yũhdũrũcaro bihosi. Cohamacũ tua yũhdũariro payũ yahpari macaina mehne sua yũhdũara. To ã suachũ cawalo bui pisariro tinare tuaro buhiri dahrerohca. 16 To suhtiroi, to ñũchũcũ cũhũre ahri wamare joa õri jihre: “Jipihtina paina pũthoa bui pũthoro”, ni joa õri jihre.

17 Baharo sũ siroi ducurirore anjore ñũhi. Jipihtina mũanopũ wũinare yuca perire sañurucu mũohre tiro. Ǻ sehe ni tuaro sañurucu mũohre:

—Cahmachuna taga. Cohamacũ to bose nũmũi chũna taga.

18 Payũ yahpari macaina bui pũthoare, surara pũthoare, surara perire, cawaloare, tina bui pisainare, jipihtina paina masare, dahra cohtainare, dahra cohtaina jierainare, paina pũthoare, wiho jiinare tina jipihtina ti pjacũri cjirire chũna taga —nihre anjo yucaare.

19 Baharo nũcũ macarirore, ahri yahpa macaina bui pũthoa ti surara peri cũhũre ñũhi. Tina cahmachuhre cawalo bui

pisariro mehne to yaina surara peri mehne cahma wajāa taa. 20 Ti ā cahma wajāchũ cawalo bui pisariro nũcũ macarirore peresu yoahre. Pairo “Cohamacũ yare yahu mũhtariro jija”, ni mahñoriro cũhũre peresu yoahre. Tiro mahñoriro sehe nũcũ macariro to ñũrocaroi bajuamehneare yoariro jihre. To bajuamehnea mehne nũcũ macariro to wamare wahāinare to masũre ño payoinare mahñohre “Ahri Cohamacũ ya jira”, nino. Tina pũarore to peresu yoari baharo tinare catiinareta pichacapũ cohāhre. Tí pichaca pjiri ma puro jiri pichaca pjiri pichaca azufre mehne jũri pichaca jihre. 21 Ā jiro dũhsainare ti surara peri cjirire ñosari pjĩ mehne to dũseroi jiri pjĩ mehne wajāhre cawalo bui pisariro sehe. Ā to wajāri baharo yucaá peri ti pjacũri cjirire chũa, yapi yũhdũa wahahre.

Mil cũhmari waro Cristo to yaina mehne masare dutirohca

20 1 Baharo paio anjo mũanopũ to dujia tachũ ñũhi. Cũāri copa macari sawire, pjiri da, comaa da cũhũre cjuahre tiro. 2 Ā duji wihiro pinonore ñahahre tiro. Tiro pinono panopũ pinono sehe pjacũ tiri jiro, watĩno Satana wama tiri jihre. Tire ñahano tire dũhtehre mil cũhmari waro peresu yoaro taro. 3 Ā dũhte tuhsũ, cũāri copapũ cohāhre tire jipihtia yahpari macainare mil cũhmari waro to mahñoahto sehe. Ā cohā tuhsũro tí copare biha, wihtā ñahanocahre. Ā jiro mil cũhmari baharo pari turi mahaa dachoricā tire wiosinohca.

4 Baharo pũhtoá dujiare ñũhi. Tí dujia dujiina cũhũre ñũhi. Tinare masa bui dutihtinare cũhre Cristo. Paina cũhũre ñũhi. Tina sehe Jesu yare Cohamacũ yare ti yahuri buhiri ti dapu pocare dũte cohārina cjiri jihre. Nũcũ macarirore to masũ cũhũre ne na tuhcuá caha sũ ño payoerare. Ā yoa ti wũhdũa pocare ti wamomacari cũhũre to wamare joa õ dutierare tina. Ā jia paina tinare ti wajāri baharo masaa wahahre tjoa. Masahre tina mil cũhmari waro Cristo mehne pũhtoá jia taa. 5 Paina Cristo yaina yariaina cjiri sehe masaerasinire. Ti wajārina ti masari baharo mil cũhmari pũhtoá ti jiri baharo paina cũhũ masaa wahaahca. Ā jia ti wajārina cjiri Cristo yaina to baharo masa mũhtaina jihre. 6 To maso mũhtaina sehe tuaro wahcheina jiahca. Ñaa marieina jiahca tina. Ā jia pichacapũ wahasi tina. Masa pichacapũ wahaá, pari turi ti yariaro sehe wahara. Ā jia tina to maso mũhtaina pichacapũ

wahaerara. Tina yaria masa mũhtaina sacerdotea jiahca, Cohamacure, Cristo cũhure ño payoa taa. Ā jia mil cũhmari waro Cristo mehne masa bui pũthoa jiahca.

7 Mil cũhmari baharo Satanare peresui jirirore wiorohca. 8 To Ā wiori baharo ahri yahpa macainare mahñono waharohca tiro. Gog wama tiinare, Magog wama tiina cũhure mahñono waharohca. Ā jia tina to mahñoare tũhoa, ti surara perire cahmachuahca cahma wajãa taa. Tina surara peri payũ jiahca. Pjiri ma macaa padũ pohcaricã payũ ti jiro seheta payũ surara jiahca. 9 Tina ahri yahpapure waha sitea, Cohamacũ yaina ti jiri macare Cohamacũ to cahĩri macare soroa wahaahca. Ti Ā soroari baharo Cohamacũ tinare mũano macari pichaca mehne jũroca bororohca. 10 Ā wahari baharo watĩnore tinare mahñorirore pichacapũ cohãnohca. Tí pichaca pjiri ma puro jiri pichaca azufre mehne jũri pichaca jira. Tórpũ nũcũ macarirore “Cohamacũ yare yahu mũhtariro jija”, ni mahñorirore cohã tuhsũhre. Tóí ti jichũ dacho, ñamipũ cũhure Ā ñano purĩrucurohca tinare.

Cohamacũ masare buhiri dahre batoara

11 Baharo pjíro pũthoro to dujirore noano yehserore ñũhi. Tí dujiro bui dujiro cũhure ñũhi. Tóí to dujichũ, ahri yahpa macaa cũhũ mũano macaa cũhũ pihtia wahahre. Ā pihtia wahaa pari turi ji namoerare. 12 Ā yoa pũthoro panoi yariaina cjiri ti ducuchũ ñũhi. Tina wiho jiina, pũthoa cjiri cũhũ jihre. Tóí ti ducuchũ joa õa tjurire pjõohre. Tí tjuri masa ti yoirire ti joa õa tjuri jihre. Ā jiro beseriro tí tjurire ñũ tuhsũ ti yoirire masihre. Tíre masino yariainare besehre ñaina, noainare. Baharo pa tju cũhure pjõohre. Tí tju Cohamacũ mehne Ā jirucuhinare ti wamare joa õri tju jihre. 13 Baharo pjiri mapũ yaria miniina, diapũ ti cohãrina cũhũ wahcã mũjaa wahahre. Ā yoa yahpa puhichapũ jiina, yariaina ti jiropũ jiina cũhũ mũjaa wahahre. Ti Ā mũja sũchũ tóí dujirore ti yoirire masi pahñono, tinare besehre ñaina, noainare. 14 Baharo yariarore, yariaina ti jiro cũhure cohãnocahre Cohamacũ pari turi mari yariaerahto sehe. Pichacapũ cohãnocahre. Tí pichaca pjiri ma puro jiri pichaca pjiri pichaca jihre. Pichacapũ wahaina sehe pari turi yariaina seheta wahara. 15 Ā jiro Ā jirucuhina ti wamare Cohamacũ to joa õri tjui jipihtina ti wamare joa õmahnoeraina sehene pichacapũ cohãhre tiro.

Muano, yahpa cūhure wahmaare cohtotarohca Cohamacu

21 ¹ Baharo muano, ahri yahpa cūhure wahmaare to cohtotarire ñuhi. Muanoꝑu ji muhtari, yahpaꝑu ji muhtari, pjiri mapu ji muhtari cūhu pihtia wahahre. Mariahre. ² ã yoa yūhu João noari macare, wahma macare Jerusalēne ñuhi. Tí maca muanoꝑu Cohamacu cahapu to duji tachū ñuhi. Wamomaca dūhtehticorore noaa suhti mehne wahma sūora wamomaca dūhtehtirore wahchechū yoaro taro. Tó seheta tí macare cahnoyure Cohamacu, to yainare wahchechū yoaro taro. ³ Tíre yū ñuri baharo ꝑūhtoro dujiꝑu to sañurucuro coa tachū tūhohi:

—Ñuga. Mipure masa watoi jiro nina Cohamacu. Tina mehne jirohca tiro. ã jia to yaina jiahca tina. ã yoa Cohamacu to basi tina mehne macariro jiro, ti yairo Cohamacu jirohca. ⁴ ã jiro ã wahcherucuchū yoarohca tiro tinare. ã jia pari turi cahyasi tina. ã jia ne pari turi yariasi tina. Ne ñano yajeripohna tia, yahco tia, ꝑuríã cūhu mariahca tinare. Ahri jipihtia ꝑanoꝑu macaa cjiri pihtia wahaahca —ni sañurucuro coa tahre.

⁵ Baharo ꝑūhtoro dujiꝑu dujiriro õ sehe nihre:

—Ñuga. Jipihtiare wahma cohtotachū yoaihca —nihre.

To ã niri baharo yūhure õ sehe nihre tjoa:

—Ahri yū niare joa naga. Yū nia potocã tjira. ã jiro yū niriro seheta ã waharohca. ã jicū yū niare joa naga —nihre yūhure.

⁶ Baharo õ sehe nihre tjoa yūhure:

—Tó puro tjica. Yūhu jipihtiare bajuamehneriro jija.

ã yoa jipihtiare pihtichū yoah tiro jija tjoa. Ñahma yapioina tuaro ti core cahmano seheta yū cahapu waha duaina Jesure cahmaahca. ã jia Jesure yūhtiahca. Tiro catichū yoaa co yoaro sehe jira. Tirore cahmainare wapa cahmano marieno yūhu mehne ã jirucuchū yoaihtja tinare. ⁷ Jipihitina yūhure wacū tua duhuerainare õ sehe yoaihtja: Ti yairo Cohamacu jiihtja. ã jia tina sehe yū pohna jiahca. ⁸ Wiho mejeta cuiã yū yare duhuina, yūhure cahmaeraina, ñabiaare yoaina, masare wajãina, numia mehne ñano yoaina, mūa mehne ñano yoaa numia, yaya, “Cohamacu jira”, ti nia masurine ño payoina, jipihitina mahñoina pichacapū wahaahca. Tóí pjiri ma puro jiri pichaca pjiri pichaca azufre mehne jūno nina. Tóꝑu wahaina pari turi ti yariaro sehe waha nina —nihre yūhure.

Wahma maca Jerusalēne yahuha

⁹ Baharo cūiro anjo yu cahapɔ wihihre. Tiro siete wahwari cjuaina, to buhiri dahre dutiro to cūina anjoa mehne macariro jihre. Ñ wihiro, ñ sehe nihre yuhure:

—Ñui taga. Cordero to wamomaca datericorore ñoihca mūhure —nihre anjo yuhure.

¹⁰ To ã nini baharo Espiritu Santo yuhure Cohamacu ya macare ñohre. Ñ sehe bajuro ñohre yuhure: Mɔadu tūcu buipɔ yuhure na mɔjahre. Tópu Jerusalēne Cohamacu ya macare noari macare ñohre yuhure. Cohamacu cahapɔ mɔanopɔ jiri maca duji taro nihre ahri yahpɔ. ¹¹ Cohamacu to si sitea mehne si siteri maca jihre tí maca. Wapa tia tãa yoaro sehe si sitehre. Diamante wama tia tãa yoaro sehe si sitehre. Ñ yoa vidro yoaro sehe noano co sitiri maca jihre tí maca. ¹² Pjiri sahrĩno mɔari sahrĩno ti sahrĩ sãari maca jihre tí maca. Doce sopacari tihre tí sahrĩno. Tí sopacaripe cohtahre anjoa. Tí maca macaa sopa pahmaripɔ Israe masa curuari doce curuaripe ti wama wahãhre. ¹³ Sũ mɔja taro sehe tí sahrĩno cjuahre tia sopaca. Norte sehe tia sopaca jihre. Sur sehe tia sopaca jihre. Sũ sãano sehe cūhure tia sopaca jihre. Jipihtiro doce sopacari waro cjuahre tí sahrĩno. ¹⁴ Tí sahrĩno doce tãa bui pisahre. Tí tãape Cordero to cūrina doce to cūrina sã cãina wama wahãhre.

¹⁵ Ñ yoa anjo yuhure yahuriro quihõdu uru mehne ti yoadure cjuahre. Tí macare, tí maca macaa sopacaripe, sahrĩno cūhure quihõno taro nihre. ¹⁶ Tí maca to yoaro purota sahre. Mɔano cūhũ tó purota mūahre. Ñ yoa anjo to quihõdu mehne tí macare quihõhre. Tí maca dos mil doscientos kilómetros yoari maca jihre. Tó purota sari maca jihre. Tó purota mɔari maca jihre. ¹⁷ Ñ jiro tí maca macari sahrĩnore quihõhre anjo. Sesenta y cinco metros mɔari sahrĩno jihre. Masa mari quihõno sehetã quihõno nihre tiro anjo.

¹⁸ Tí sahrĩno diamante wama tia tãa mehne to yoari sahrĩno jihre. Ñ yoa tí maca sehe uru mehne to yoari maca jihre. Tí uru wete mariea jia vidro yoaro sehe noano co sitihre. ¹⁹ Tí sahrĩno docai jia tãare payɔ soro jia wapa tia tãa wahãhre. Tí tãa sahrĩnoi pisaa tãa doce tãa jihre. Ji mūhtaria tãcare diamante wama tia tãa wahãhre. To baharo jiria tãcare zafiro wama tia tãa wahãhre. Pɔaria baharo jiria tãcare ágata wama

tia tãa wahãhre. Tiaria baharo jiria tãcare esmeralda wama tia tãa wahãhre. **20** Pititia poca baharo jiria tãcare ónice wama tia tãa wahãhre. Cũ wamomaca pihtia poca baharo jiria tãcare rubí wama tia tãa wahãhre. Seis poca baharo jiria tãcare crisólito wama tia tãa wahãhre. Siete poca baharo jiria tãcare berilo wama tia tãa wahãhre. Ocho poca baharo jiria tãcare topacio wama tia tãa wahãhre. Nueve poca baharo jiria tãcare crisoprasa wama tia tãa wahãhre. Diez poca baharo jiria tãcare jacinto wama tia tãa wahãhre. Once poca baharo jiria tãcare amatista wama tia tãa wahã batoahre. **21** ã yoa doce sopa pahmari doce perla mehne to yoaa pahmari jihre. Tí pahmaripe cũ yapa perla yapa mehne to yoaa pahmari jihre. ã jiro tí maca macari maha uru mehne to yoari maha jihre. Tí uru wete marieni uru jihre. ã jiro vidro yoaro sehe noano co sitiri maha jihre tí maha.

22 Tí macai Cohamacu wuhure ñerahi. Mariahre. Tí macai jipihtiropu mari puhtorore Cohamacu tua yuhduarirore, Cordero cũhure ño payora masa. ã jiro tí maca jipihtiro Cohamacu wuhu yoaro sehe jihre. **23** Tí macai Cohamacu to si sitea noano buhriahre. Cordero cũhu sihãria yoaro sehe buhriahre. ã jia sũ dacho macariro cũhure ñami macariro cũhure tói ti buhriachu cahmaerare. **24** ã yoa ahri yahpai ti buhria mehne jahca jipihtiro macaina. ã jia jipihtia yahpari macaina puhtoa tí macapu noa yuhduu ti cjuare na wihiahca. **25** ã yoa dachore tí maca macaa sopacari p̄jõori sopacari jahca. Tóp̄u ne ñami marianohca. ã jia ti sopacarire ne bihasi. ã susurucuahca. **26** ã yoa jipihtia yahpari macaina noaare ti cjuare tí macapu naa wihiahca. **27** Ñaa sehere tí macapu ne naa wihisi. Buo tichu yoaina, ñaare yoaina cũhu tí macapu ne wahasi. Mahñoina cũhu wahasi. Cordero to joari tjuu ti wama wahãina dihta tí macapu wahaahca. Tí tju to yuhduchu yoaina ti wamare to joa õri tju jira. Tí tjuu ti wama wahãina ã jirucuahca.

22 ¹ Baharo noari mare catichu yoari mare ñohre yuhure anjo. Tí ma noano co sitiri ma Cohamacu, Cordero cũhu ti dujiropu tari ma jihre. ² ã yoa tí maca macari maha dacho macai buruahre tí ma. Tí ma pu bũhuseheri dũhtu cahai catichu yoaa yucu ducuhre. Tí yucu sũripe dicha tihre. Cũ cũhmare doce tahari dicha tihre. ã yoa tí yucu macaa p̄uri

mehne noano co tiahca jipihtia yahpari macaina. ³ Tí macare ne ñaa marianohca. Tí macai Cohamacu to dujiro jirohca. Cordero to dujiro cūhū jirohca tói. ã jia jipihtina masa tói jiina tinare dahra cohtaina tina pano na tuhcuca caha sū, tinare wahche payoahca. ã jiro tói ñaa marianohca. ⁴ Tina Cohamacure ñū piti boca dujiahca. ã yoa ti wāhdūa pocai to wama wahāina jiahca. ⁵ Tópure ñami marianohca. ã jia sihāa pocare cahmasi tói jiina. Sū to buhriachū cūhūre cahmasi. Mari pūhtoro Cohamacu to buhriaro jirohca. ã jia tí macai jiina pa sehe macaina bui pūhtoa ã jirucuahca.

Jesucristo ahri yahpapū to tjua tahto mahanocā dūhsara

⁶ Baharo anjo yūhūre ō sehe nihre:

—Jipihtia ahri ti yahuri cjiri potocā tjira. ã jia ti niriro seheta waharohca. Mari pūhtoro Cohamacu to yare yahu mūhtainare masichū yoariro jira. Tiro sehe mipūre to yairo anjore warocahre tirore dahra cohtainare masichū yoaro taro. Baharocā to dohse wahahtore masichū yoaro taro to yairo anjore warocahre —nihre anjo yūhūre.

⁷ Jesu sehe ō sehe nihre:

—Tūhoga mūsa. Mahanocā dūhsara yū tjua tahto. Ahri tju macaa yahuare yūhdūrucaeraina wahcheina jiahca —nihre Jesu.

⁸ Yūhū João ahri jipihtiare yū joa narire tūhohi. ã yoa tíre ñūhi. ã jicū yū tūhori baharo, yū ñūri baharo yūhūre ñoriro anjo panoi na tuhcuca caha sūmahī. Tirore ño payoi tai nimahi.

⁹ Yū ã yoachū ñūno ō sehe nihre yūhūre:

—Tíre yoai tjiga. Mū jiro seheta jiriro yūhū cūhū Cohamacure dahra cohtarirota jija. Mū coyea Cohamacu yare yahu mūhtaina, jipihtina ahri tju macaa dutiare yoaina cūhū ti jiro seheta yūhū cūhū Cohamacure dahra cohtarirota jija. ã jicū Cohamacu panoi na tuhcuca caha sū, tiro sehere ño payoga —nihre anjo yūhūre.

¹⁰ ã yoa ō sehe ni yahu namohre yūhūre:

—Ahri tjuī baharo to dohse wahahtore yahura. To ã wahahto mahanocā dūhsara. To ã mahanocā dūhsachū ahri tjuī yahurire nūoi tjiga mūhū. ¹¹ Tí pja yū yahuri pjare ñaina sehe ã yoarucuwahnojaro ñaare. Ñaputiina cūhū ñabiaro yoarucuwahnojaro. Noaina sehe noano yoarucujaro. ã yoaga

ñaa marieina ã ñaa marieina jirucujaro tí pjare —nihre anjo yũhũre.

12 Õ sehe nihre Jesu:

—Tũhoga mũsa. Mahanocã dũhsara yũ tju tahto. Mũsare yũ yainare yũ wahtore na tai tai nija. ã jicũ noaare mũsa yoari wapa mũsare noano yoaihtja. 13 Yũhũ jipihtiare bajuamehneriro jija. ã yoa jipihtiare pihtichũ yoah tiro jija tjoa.

14 'Jipihtina wetē mariea suhtire sãaina ti jiro seheta ti ñaa yoari buhirire cosaweina tí macapũ sũahca. ã sũa, tí maca macaa yucũ catiare waa yucũ dichare chũahca. ã jia wahcheina jiahca tina. 15 Tí macapũ sũeraina sehe ahrina jira: Ñabiaina, yaya, numia mehne ñano yoaina, mũa mehne ñano yoaa numia, masare wajãina, “Cohamacũ jira”, ti nia masũrine ño payoina, mahño ji coaina, mahñoa payũina cũhũ jira tí macapũ sũeraina —nihre Jesu.

16 ã yoa õ sehe ni yahu namohre Jesu:

—Yũhũ, Jesu yũ yairo anjore warocahi mũsare yũ yainare ahri tju macaare yahui tai. Pũhtoro Davi panamino ji turiariro jija yũhũ. Yũhũ bohrea mũja tachũ mũja taria noano si siteria ñahpichoca yoaro sehe jiriro jija —ni yahu namohre Jesu.

17 Espíritu Santo Jesure “Tjua taga”, nina. Jesu yaina to wamomaca dũhtehticoro yoaro sehe jiina cũhũ “Tjua taga”, nina. Jipihtina ti “Tjua taga”, nirire tũhoina cũhũ “Tjua taga”, nijaro Jesure.

Ñahma yapioina core tuaro ti cahmano seheta Cohamacũ cahapũ waha duana Jesure tuaro cahmaga. Tiro catichũ yoaa co yoaro sehe jira. Tirore cahmainare wapa cahmano marieno ã jirucuchũ yoarohca Cohamacũ.

18 Yũhũ João, jipihtina ahri tju macaare Cohamacũ yare tũhorinare mũsare õ sehe ni cua pisaro mehne yahuihtja. Ahri buhea mehne paye buhea mehne more suhu yahu namoina Cohamacũre yũhdũrucã nina. Ti ã yũhdũrucachũ ñũno jipihtia ahri tju to buhiri dahrehtore to yahuriro seheta cũnohca tina cũhũre. ã jiro tó seheta tina cũhũre buhiri dahrerohca.

19 ã yoa ahri tju macaa yahuare yahu dũhaina Cohamacũre yũhdũrucaina jira. Ti ã yũhdũrucachũ ñũno catichũ yoaa yucũ dichare tinare chũ dutisi. ã jia ã jirucusi tina. Tuhsũ, to ya macapũ noari macapũ waha dutisi. Tí yucũ, tí maca cũhũ ahri tju ti yahuripũ jira.

20 Jipihtia ahri tju macaare yahuriro ò sehe nina:

—Ñ tjira. Mahanocã dũhsara yahpapũ yũ tjua tahto —nina tiro.

Ñ tjia. Sã pũhtoro Jesu tjua tahga.

21 Mari pũhtoro Jesu to cahĩa mehne jipihtina mũsa noano jiga.